

返性圖輯要寶錄


坤冊

風陵文庫

文庫19

F322

2



關聖帝君序

夫人也何謂人。夫性也何謂性。天之生也謂之人。天之賦也謂之性。性之在人也。謂之元善。人之有性也。謂之天良。維皇誕降之初。性固不離乎人。人亦不離乎性也。試爲諭之。蓋人之生初。始有知則先之議其母。始有學則先之呼其親。孟子云孩提之童。無不知愛其親。及其長無不知敬其兄。人性之本善。理固然也。及至知識漸開。事爲各異。敏捷者謂之知。暗昧者謂之愚。循禮者謂之賢。偏僻者謂之否。因稟受清濁之不同。故知愚賢否之各別。此上古之世。民風淳樸。尙如是之攸分。斯亦古人舉直錯枉之至意。而

旋轉可自入為。豈若今日之勢。紛紜擾攘。名利奔馳。將本然賦畀之良。任令其散失。滔滔然如水之下流。而不能返。吁。誠可悲已。吾奉

上帝命。飛鸞開化。設盡良方。邀儒教之賢哲。集釋道之仙真。洩上天之元機。明地府之果報。詳倫常之實理。剖人道之大端。指世路之非為。施膏肓之藥石。降此一書。而名曰返性。誠欲使當世之人。返忤逆之性。為孝順之性。返澆漓之性。為忠厚之性。返奸詐之性。為誠樸之性。返血氣之性。為童穉之性。理欲天人。語誠詳確。孝弟忠信。剖晰詳明。赤子而不負吾心也。又何患世道之不可挽。昇平之不可復

見也哉。今圖書已半。特降序文。蓋冀此書速成。以為世人

勸

聖清咸豐五年歲次乙卯孟夏月朔七日午時降著

文昌帝君序

竊以陰陽之道。微妙無窮。誕降之原。人物各異。統知覺運動而別之曰物。智愚賢否而謂之曰人。仁義禮智而名之曰性。物與人別。別於性。並別於形。人與物分。分於性。實分於命。此人所以爲萬物之靈。性所以爲萬善之歸也。獨是性也者。人之所固有。人也者。性之所維持。無本性則不可爲人。無人道又烏其爲性。聖也賢也。人也。仙也佛也。亦人也。然豈果人也哉。聖賢仙佛。雖自人爲之。實自性爲之也。實自能盡其性能葆其性爲之也。蓋惟能盡其性。而性量之地見天真。則聖賢無難事。抑惟能葆其性。而性命之中

有實際。則仙佛可以登。如是則人不足重也。性足重也。性何以重。厥重在返。返乎哉。勿畏難。勿苟安。勿自暴自棄。而迷於歧途。勿欺己欺人。而傷乎忠厚。勿因前之積惡。而生畏心。勿懼後之難修。而生退志。矢力潛心。持修性道。則聖賢可以成。仙佛可以至矣。然豈果人也哉。而又何嘗非人也哉。盡性葆性之要。慎其返諸。

嘗

聖清咸豐五年歲次乙卯孟夏月望一日卯時降著

孚佑帝君序

自三才定位。人得中生。太極圓光。渾然各足。穆穆其元。湛湛其體。初無缺限之可指也者。所謂性無有不善是也。然而自有者天也。自爲者人也。人不自爲。則負自有。負自有。則斲天。烏乎其至善。又烏乎其爲性。噫。人之不可無功於性。無功於天也。良亦切矣。當今之世。澆漓之風。遍於里黨。變詐之習。滿乎閭閻。教澤已衰。誰復遵其

聖訓。風俗不古。孰能凜厥

王章。綱常名教之大防。盡壞於驕奢淫佚。仁義禮智之實德。俱敗於利欲貪嗔。世風之衰也。人心之下也。性道之沒

也。嗚呼悲哉！我

關大帝下憫人心。上悲天運。叩懇

蒼穹。宏開教化。慤慤然以正人心。消未劫。是任其愛爾等赤子之心。望爾等赤子之意。真至極無以加矣。世之陷於驕奢淫佚。迷於愛欲貪嗔。失其性而不知返者。至此猶不知返哉。果爾是無人心也。是直禽獸也。尙得謂之人哉。爾等平日有清明。其何以對我。

關大帝

告

聖清咸豐五年歲次乙卯孟夏月望二日午時降著

斗口大魁序

嗟嗟。人性之返。何若是之難也。然其意果何居哉。吾試爲之探原而詳言之。蓋人之賦性也。孰無仁義禮智。人之有性也。孰非慈孝謙恭。太和之氣。離母胎而已生。純粹之躬。隆教育則愈備。聖賢由此希。仙佛由此造。而不假襲取外。鍊爲也。無如嗜欲漸開。斯禮義漸滅。浸假而利祿耗其精神。浸假而酒色淆其志向。浸假而奸盜邪淫奪其元陽。昏昏迷迷。全無半點人氣。悠悠泛泛。何有一善可觀。此身未亡。已爲鬼屬。其心已死。何異獸形。倫常之內。天性未見。分毫利欲之中。本性忘於烏有。前此赤子初心。到此滅絕。他

年白髮回首。猶是罔生。種種非爲。屢屢惡孽。無怪朝廷之王章。不能革其陋習。孔孟之大道。難以維其天良。蓋其污染之既深。斯返之尤難也。今於無可如何之會。降此返性圖書。發古來未發之至理。洩造化未洩之真機。明世人難明之隱微。動梗頑難動之天性。探眾善之實理。繪爲一圖。真有回天之功。度世之力。誠返性之要藥也。今圖書將成。昇平可望。奉命作序。又余之所深幸而樂爲也夫。

聖清咸豐五年歲次乙卯孟秋月朔六日亥時降著

地藏王菩薩序

塵寰落落。人類紛紛。慧眼遙觀。惡氛盡熾。觀三千之世界。嗟億萬之生靈。倫紀敗於家庭。孝弟安在。欺詐遍於都市。忠信悉忘。勢利矜誇。背禮因而滅義。貪污成性。鮮恥於以寡廉。極目富貴貧窮。未犯者不異碩果。統閱智愚賢否。曾行者有如恒沙。無怪福祿消滅。孽籍累如山邱。時運乖違。凶星遞爲纏擾。足未至於幽冥。已陷地獄。身雖生於陽世。早作罪囚。此皆人之心爲之也。而天心不忍矣。天之律難寬矣。而神聖不安矣。幸矣哉。關大帝通明苦奏。勅開化以飛鸞。

文帝君桂籍權衡。願牖民而覺世。仰
孚佑之仁慈。垂書降筆。仗

大士之法力。振聵發聵。誥誡叮嚀。費辛勤於數載。奔勞旦
暮。宏誓願於一書。統天地人三曹。元秘盡洩。舉儒釋道三
教。妙蘊悉昭。盡美盡善。至微至精。臨壇作序。贊

聖恩之無窮。精妙莫名。謹稽首而作偈。偈曰。

大哉是圖。

名曰返性。

訓誥典謨。

孝弟忠信。

璧合珠聯。

金鐘玉磬。

集一大成。

羣經包孕。

皆

聖清咸豐五年歲次乙卯孟秋月望六日卯時降著

土神張公序

夫序者。緒也。循其緒而詳言其事。探其緒而實按其原也。

返性圖一書。屢經

諸神贊揚。

羣真嘆賞。其緒其原。無不曲盡精微。夫亦何庸再贅。然茲

特奉

命。因不辭簡陋。是為謹序。夫天下之善書多矣。而正人心
維世道者。莫如返性圖一書。天下之勸文亦夥矣。而明功
過別善惡者。亦莫如返性圖一書。何言之。人心不懲則不
動。不指則不悔。世道不輔則不轉。不勵則不善。是書則指

隱微說風氣。幽獨屋漏。嚴若大廷。領其訓者。無不翻然復
亟。然改也。所謂正人心者此也。世風於今。機械變詐。雖有
善者。亦無可如何。而圖內反復指陳。歷言世情之病根。明
點斯人之惡習。明者讀之。愚者聽之。自可由警斯畏。由畏
斯勵。同登善域。共踐德門。而宇宙安焉矣。所謂維世道者
此也。至於功過善惡。格言無不詳明。古訓皆為切實。要其
摘隱伏。指非為。何者為功。何者為過。善有真假之分。惡有
大小之別。若對鏡若權衡。若砥礪刻責。誘掖獎勸者。實斯
圖盡之。亦是圖包之。而涵之也。所謂明功過。別善惡者。此
也。嗚呼。大矣哉。是圖之有功於斯世也。豈淺鮮哉。吾幸叨

神職。忝辱卑位。每恨是書相見之晚。朝夕詠嘆。獎譽不置。
蓋不意得伸其贊揚之忱也。撰序之餘。不勝惶恐之至。

肯

聖清咸豐五年歲次乙卯中秋月望一日戌時降著

返性圖輯要寶錄總目

坤冊

關聖帝君 諭

關將軍 諭 又體恤親族孤弱子姪文

桓侯大帝 交別損益不計貧富文

周將軍 貧賤絕支富貴連譜文

王將軍 諭 又輕事孀母薄從弟妹文

廖將軍 諭 又輕事鰥父文

趙將軍 戒婦女繡字蹟神像文

關將軍 爲官宜體恤罪囚文

馬天君 爲官勿聽書吏言文

桂宮袁仙 修德培命文

郭仙 地不如德文

韓文公 警世文

王天君 書差積福文

文昌帝君 科場選士敕令 又選士文

桂宮金甲神 惜字文

桂宮天龍 聽言文

桂宮地啞 謹言文

桂宮聶仙 戒殺放生文

土神張公 治家有法文

孚佑帝君 酒色財氣歌

地藏王菩薩 勸孝歌

酆都大帝 僧道失教惡報文

酆都殿前錄善司 船戶店家圖財害命惡報文

酆都殿前錄惡司 娼優流毒誤陷良女惡報文

東嶽大帝 善惡報應文

總管東方善惡司 穿窬盜賊失身喪節惡報文

總管南方善惡司 寡婦處女尼僧失節惡報文

總管西方善惡司 輕薄繼母惡報文

總管北方善惡司 繼母殘苛惡報文

一殿秦廣王 不忠惡報文 又尊卑亂倫惡報文

二殿楚江王 不孝不弟惡報文 又姦淫處女惡

報文

三殿宋帝王 六淫惡報文 又姦淫婦婦惡報文

四殿伍官王 不守婦道不孝翁姑不和妯娌惡報

文 又士人狎優惡報文

五殿閻羅天子 邪教惑世惡報文 又示 又士

人宿娼惡報文

六殿卞成王 刻薄貪財惡報文 又父母衰而薄

妻子少而厚惡報文

七殿泰山王 男不和室女不敬夫惡報文 又輕

事解父寡母惡報文

八殿都市王 刀筆淫詞離書揭帖惡報文 又富

吝貧貪不孝惡報文

九殿平等王 殺生惡報文 又妯娌不和唆夫不

孝不弟惡報文

臨安府城隍 離鄉貿易關旅肆淫惡報文

順天總城隍椒山楊公 諭

江西總城隍 打胎溺女惡報文

江蘇總城隍 獻媚工讒暗刀殺人惡報文

安徽總城隍 惑意風水久淹親樞惡報文

湖南總城隍 教訓生徒不務德行惡報文

湖北總城隍 為士竊名不修道德惡報文

山東總城隍 謗聖毀賢妄駁正教惡報文

山西總城隍 庸醫悞人堪輿輕葬惡報文

河南總城隍 窩賭剝財害人身命惡報文

陝西總城隍 大秤小斗輕出重入惡報文

甘肅總城隍 明瞞暗騙用巧使奸惡報文

浙江總城隍 吏役假威瞞官害民惡報文

福建總城隍 黨惡行凶欺凌鄉里惡報文

廣東總城隍 輕賤五穀惡報文

廣西總城隍 逞權恃勢刻苦貧窮惡報文

四川總城隍 吹食鴉片烟惡報文

貴州總城隍 豔妝惡報文

雲南總城隍 陰法無私文

威雄土主感應大黑天神 冥法先施忤逆姦淫文

十殿轉輪王 奸淫尼僧惡報文 又諭

釋迦佛祖 開闢即有因果文

九天衛房聖母 因善惡定子孫文

文昌帝君 欲貴子須積德文

王天君 殺子莫如溺愛毒文

雷府辛天君 養女不教貽後悔文

月老仙翁 婚姻文

桂宮楊仙 新婚明心志文

雷府辛天君 逆子忤媳快回頭文

桂宮呂大仙 治家戒奢華文

九天司命竈君 敬竈文

趙將軍 修齋須修德文

關將軍 戒婦女入寺燒香文

王將軍 宣講救劫文


漢趙將軍 年老宜養德文

面然鬼王 檢惡永墮鐵圍城文

關聖帝君 諭

返性圖輯要寶錄總目終

關將軍



從帝鎮荆襄雅度宏量單刀匹馬振皇綱
 昭烈保障磊磊落落正正堂堂錦蜀為棟
 梁汗青褒獎漢壽亭侯令嗣萬古馨香而
 今顯化輔王章猶是當年氣象願世人好
 學學將軍模樣老仙謬讚輕淡兒描描金
 像

雲房正陽讚

趙將軍



天地萬古 一氣彌綸 彌綸無間 蓋是天眞

將軍忠義 曰氣精醕 心若日月 輔弼其身

事君以道 運智於神 誅奸討賊 正紀明倫

捐軀殉國 社稷之臣 壯哉將軍 宇宙偉人

鐵仙讚

鐵仙讚

王將軍



漢廷傑士正統將軍鎮荊州以捍賊
扶聖帝而策勲朗朗丹心照江水昭
昭素志薄蜀雲緯武并經文志易數
三分披堅執銳蕩羣氛壯志洵超羣
赴義殉節問誰人能不欽敬今日返
性圖重見王君磊落軒昂展卷素風
熏望世人覩將軍效慕殷殷老仙這
讚何足云

果老仙讚

廖將軍



這位老將軍起自黃巾識得漢鼎從帝
 作忠臣轟轟烈烈丈夫志後漢偉人勇
 莫倫六出九伐奮不顧身旋事兩帝志
 恂恂勲業爛如弗震今在崇甯輔佐闡
 化垂綸勸忠孝救沈淪顯佑生民噓嗟
 噓嗟將軍社稷臣也亦何庸贅讚哉特
 繪金容敢讚天真
 何祖元君讚

返性圖輯要寶錄坤冊

嶺表洗心覺民恭校訂

四月朔七日亥時

關聖帝君降

諭曰吾位居天曹為上皇首相掌三天門下之事凡吉凶
 禍福無不由吾簡校神仙真宰悉皆受吾統轄此在天之
 位也至於人間頒朝廷之祀典享國家之太牢公侯將相
 士庶紳耆見吾無不跪拜此人曹之位也若夫幽都鬼國
 十殿三途所設地獄輪迴千刑萬罰皆歸吾之權衡而為
 予奪此陰曹之位也吾之位三曹其重若此吾今日之旦

書奔走。又若此。豈吾之不自惜哉。實爲今時人民片善不修。無惡不作。日積月累。以至皇天震怒。災害遞臨。吾不忍生民之遭塗炭也。因同二帝。飛鸞開化。以挽人心。以清世道。今復於此地。降返性圖一書。邀遍三教。費盡苦心。實欲救世救民。上輔國祚。下佑羣黎。共樂光天化日而已。豈有他哉。且返性圖書。皆天理人情之正。聖功王道之微。未有奇怪之語。楊墨之學。世人觀此書者。當體貼奉行。勿存異志。勿掉輕心。自然無求不應。無感不通。若見而弗見。聞而弗聞。一派欲心。毫無體念。勿論返性圖。卽將古來經傳。概行知識。有何益哉。是直衣冠禽獸而已。吾屢見世人。輕藝

善書。陰中受罰者。不可勝紀。故立前車之鑒。以爲後車之防。是亦不忍之心。所由迫也。不然。吾權衡三曹。豈區區發言者哉。爾世人。其體吾之心。遵吾之訓。勿以吾言而等諸弁髦。付之東流。庶不負吾飛鸞開化之苦心。降返性圖書之本志也。嗚呼。漢壽亭侯之心。至此盡矣。

朔八日卯時

關將軍降

諭曰。甚哉。世人之爲惡不悛也。聰明之士。薄因果而以爲渺茫。庸愚之夫。昧善惡而罔識遷改。求其天倫不愧。行事無虧者。實不異披沙檢金之難。嗚呼。世道如此。尙何望乎。

尤可怪者。世之愚夫。不明大道。常懷怨尤。故或見有爲善未獲福者。輒曰。上天之報施不公。見其有爲惡而免禍者。輒曰。造福權衡何舛。豈知報應無私。幽明原無二理。特未卽因果之理。而細思之也。何也。爲善而無福者。其祖父必有餘孽。孽盡則福必至矣。爲惡而免禍者。其祖父必有餘德。德盡則禍必臨矣。况乎彼之所謂善者。未必皆真。彼之所謂惡者。未必皆稔。苟不能深察其虛實。鑑別於隱微。徒以蠱狐之言。欺誘鄉黨。致使有志爲善者。誤其說而轉灰其心。平居爲惡者。信其言且益肆其孽。則凡聖賢之銘訓。仙佛之格言。皆被斯人一語說壞。可勝悼哉。是可殺也。今

聖父邀約真宰。降此返性圖書。洩破元宗闡明大道理則。孔孟之理。言則金石之言。道則中庸之道。不示人以難赴。悉引人於善途。斯誠暮鼓晨鐘。發聵啟聵之術也。世人見此一圖。而猶不改悔者。非人也。見此一圖。而猶不能感化者。吾亦無可如何也。嗚呼。人其勿負聖父之苦心哉。

體恤親族孤弱子姪文

今夫慈愛之心。人皆有之。其發於天良者。眞也。大抵人生之所憫恤者。莫若無父無母之人。零丁孤苦。雖路人且爲酸鼻。况其爲子姪。及親族子姪乎。觀其瞻依無靠。嘆孤弱之獨煢。恃怙云亡。嗟單隻之無着。斯時爲叔伯者。爲族父

者。爲親長者。正宜恤其饑寒。資衣食之有賴。憫其疾苦。賑
患難於安全。幸或其人樸質。須使家室之有成。倘彼聰明。
更教詩書之宜讀。如是而體。陰隲則積於無窮。若此之恤。
福田更種於廣大也。而且上可慰子姪之親心。九原亦沾。
再造。下可以成子姪之身命。畢世亦感提攜。慎勿忍心棄。
置。義絕祖宗。切戒略意輕疎。情傷姻婭。成人成美。異日之
善報有由。廣慈廣仁。他年之福緣無量。以是告爲伯叔。爲
族父。爲親長者。

朔九日酉時

桓侯大帝降

交別損益不計貧富文

損益關頭。須先精乎藻鑑。貧富常格。慎勿介於襟懷。管鮑
云遙。誰識風塵有知己。藺廉已往。難覩交情有同心。嗟嗟
友道衰亡。朋情喪失。見富貴而諂容。遇貧賤而艷色。周旋
折節。安見不貳死生。驕淫矜誇。孰是同聲氣誼。彼阿富而
言歡。烏知損之卽伏。若交貧而絕誼。詎識益之可尋。顛倒
施於友朋。致悔後來之失足。是非淆於去就。奚免異日之
喪行。損者親而益者疎。笑殺當日三傑。富者交而貧者絕。
能勿玷於五倫。夫惟識見超羣。氣節不同於流俗。綱常持
重。從違自合乎聖賢。同氣同聲。如兄如弟。立友道之則。建

朋類之的斯無損而益多。而後乃爲千秋萬世之益友。諭曰吾遍觀宇宙。糾察善惡。作惡之人。實爲擢髮難數。細爲較閱。而公門之中。尤甚夫。所謂公者。無私之謂也。自門吏書差之蒙蔽。既深以民命爲輕。以銀錢爲重。以賄賂爲當要。以曲直爲可淆。小民若有雀鼠之爭。隸卒當爲人命之案。持票在手。似虎如狼。朝廷密旨。幾無以過。明則逞其狐威。暗則巧爲漁利。民財剝盡。猶藉口於奉土急公。脂膏併吞。罔關心於童號婦嘆。未見有司之面。而微產爲之一空。既懸聽審之牌。而案錢無由措辦。斯時門吏書差。猶復貪婪無厭。百計誅求。往往有因殘酷而損厥性命者。卽能

含垢忍辱。而中心之結恨。亦已深矣。迨至積累日深。流毒日久。民不堪命。不受朝廷約束。不懼王章威嚴。世風之壞。緣由此也。嗚呼。門吏書差。下人也。而妄自弄權。若是舞弊。若是其罪。已不容誅。彼爲有司者。不知該當何咎也。

朔十日丑時

周將軍降

貧賤絕支富貴連譜文

竊以物本乎天。人本乎祖。物得天而萬物於以生。人承祖而眾孫於以繼。此人物所以無二理也。夫自高曾祖。禰流傳宗派。或五世而異居。或三代而別爨。要其本源則一也。

絕未聞宗支貧賤卽爲之疎。迨不顧者亦未聞因宗支貧賤致與富貴連譜者。而孰知有貧富者焉。有慕貴者焉。有貧慕富貴同姓。輒不勝始爲之親。繼爲之諂。而竟與之連譜焉。噫。若而人者。葉同根而隔絕。不顧瓜瓞之源長。結異姓而連宗。竟忘菽麥之分別。疎此貧賤。圖富貴而忍作子孫。羨彼寵榮。棄寒微而甘爲滅絕。稱爺呼父。尤甚於派衍同宗。拋族忘親。那計乎曾祖厥考。卑污下賤。壞紀滅倫。斯眞名教之罪人。而爲天條所不赦也。故勸爲人者。篤親仁之誼。敦大節之行。本宗卑賤。視之勿忘。祖宗異姓。光榮到底。終爲別姓。聖諭之篤宗族。以昭雍睦。是可寶也。富貴連

譜勿之勿之。

卯時

王將軍降

諭曰。余漢末一武夫耳。從隨聖帝。拒魏吞吳。赤心保國。心無貳志。知當世惟先帝者可臣。故雖執銳披堅。馳驅戎馬。余皆效命不辭。亦謂捐軀報國。要皆爲臣者分內事耳。不期沒後。蒙天帝錄功。得一忠摯之賜。令職司雷部。使余得居崇甯。復從聖帝鞍前馬後。此亦余之意想不到者也。然今日之榮。皆當年之造。何者。當時吳魏縱橫。正統孱弱。在小見之士。營求利達。非失身於曹籠。卽墮節於吳寶。漢字

國圖大綱倒置。雖有建樹。綱目不以功書。縱能捐軀。史筆不以節錄。如張昭。荀彧。呂蒙。徐晃等輩。非無長材。而所事不正。故史書皆鄙削之。然實無遠識之陷誤耳。余愧力弱才淺。不能大展勲猷。幸立志稍堅。得全漢節。今日爲神。猶不忘大漢二字。數年以來。人心趨下。世風澆漓。聖帝恐綱常漸滅。人道傾頽。爰奉帝敕。飛鸞開化。救世垂書。余等隨駕雲遊。幾遍天下。無非望世人回心向善。共享昇平。以遂聖帝護國佑民之志焉耳。今奉命來壇。別無勸爾等之事。特因爾等素讀孔孟之書。咸知堯舜之道。所戒所從。悉備大體。諒亦一鄉之善士乎。但宜具一番遠識。貫徹大道。不

可因人言爲善無益。而卽生退心。不可謂世俗爲惡。未禍而生他異想。具定識力。立定根基。同流合污。在所不爲。自然理存欲退。過去功多。又何患不能成善人耶。人能宏道。非道宏人。爾等其黽勉從事。

輕事孀母薄從弟妹文

今夫聖王發政施仁。施及寡。并及孤。殷殷然以是爲急務者。何也。蓋以天下之可悲可憫者。莫斯人若也。當其夫婦凋零。嘆失羣於孤燕。琴瑟殞沒。傷折偶之哀鳳。幼子煢獨。以無依。悲先君之早逝。弱女丁零。而失怙。痛慈父之已亡。萱幃冷落。惟望長子以安身。荆樹淒涼。端賴阿兄之顧念。

此其情。古今傷之。路人嘆之人情所不忍言者也。何乃奸頑之徒。罔慰孀母之心懷。不恤弟妹之孤弱。闥情篤堂上之饑寒。不知兒女情深。骨肉之衣食不問。而且肆行無忌。輕薄居身。對妻孥而談穢語。不慮松節之難安。常刻虐以待同胞。那計萱堂之隱痛。子道衰而友道廢。天良何存。慚爲子而慚爲兄。人道喪盡。詎知愛憐少子。原屬父母所同情。苟以殘刻相加。已陷不孝之罪案。禽獸無異。卽斯人之謂也。法律甚嚴。爾輩其能逃乎。世之染此病者。急早服是藥。焉則庶乎可弗危矣。

午時

廖將軍降

論曰。吁嗟乎。老親之不可不孝也。旣非康健之精神。愈形衰敗之憂戚。風燭瓦霜。是可懼也。乃世間忤逆之徒。不惟不及時以盡孝。反有離親而貪名者。圖利者。詎知升斗之糈未至。而菽水已斷於椿萱。豐亨之兆未期。而高堂日卽乎困憊。况乎妻妾之善否不可知。庭幃之春秋能幾日。而乃壯遊風塵。癡情道路。風花怡行人之志。烏月寫阿老之悲。親有憂心。將誰解釋。親有思志。果孰體承。親而鮮衣服兮。徒向子媳而垂淚。親而無甘旨兮。誰識暗背以傷心。噫。是可誅也。名利何在。實激怒於雷霆。名利卽來。安補過於

萬一况一旦風木淒悲終天抱恨血淚不及於黃泉豐牲
何與夫白骨罪積不孝將何地以作贖計哉世之有老親
者見吾此言當亦稍動心也夫

輕事解父文

吁嗟乎椿樹衰殘老父之春秋已邁桑榆晚景嚴君之歲
月幾何親之老也人子之憂也而矧其為解父也哉獨是
父而解也枝傷連里痛夫婦之凋零鳥失比鄰哀閨闈之
孤獨舉案齊眉今亡已矣同心比目能不悲哉此時為人
子者養志承歡尙恐堂上之失意盡心供職猶慮暗中之
悲傷何乃以孝之惟恐不及者反為輕事之饑寒則衣食

不問憂喜則解慰莫聞違傲時施於高堂安問晨昏定省
挾制常行於乃父惟見厲色疾聲致使居解之父時憂悶
於胸懷無可解免常抱憾於日月痛不欲生嗚呼子道衰
而孝德沒忤逆之罪上通於天也可弗懼歟然則為人子
者果如何而後可以事解父哉必須察其心志慰其甘煖
窺其好惡庭幃之地盡子道以承歡朝夕之間體親心而
莫懈如是則解父之心慰解父之願遂人子之孝德亦於
是乎盡矣不然不惟天道難容而循環之報即在身後矣
事解父者其凜之

酉時

趙將軍降

戒婦女繡字蹟神像文

蒼頡造字。垂萬古之文明。仙佛傳經。闡三教之大道。惜億萬之字文。澤榮壽算。敬神明之圖像。福蔭子孫。何乃愚婦無知。常繡文字於衾枕。惡女不德。恆織神像於絲羅。豈知挑針鏤線。雖屬婦女之常情。而繡像編文。實干糾察之震怒。或引詩句而綉文。時供玩賞。或以仙佛而織錦。每好新奇。詎識褻一字。則奪算奪紀。天罰毫無錯差。繡一像。則欺神欺靈。罪歟烏容。或恕。況乎挑花繡草。已犯暴殄之條。豈謂織字績神。倖免禍殃之罪。由此推觀。能勿儆心惕念。至

是改轍急宜。永戒力懲。勤操女工。而家庭可以盡孝。潛修婦德。而永慶自然。來臨縱屬。半畫半形。宜加敬重。時而用絲用縷。切忌輕心。文理直詳。望諸生之勸諭。篇辭粗淺。實若輩之砭針。

望一日子時

關將軍降

為官宜體恤罪囚文

天下之可憐者。莫如罪囚。而最宜體恤者。亦莫如罪囚。何言之。人未有無故而犯法者。即未有甘心為罪囚者。特以一時冒昧。遂致憲典莫容。此其間之是非真偽。輕重顯微。

為官者詎能漠不關心是宜道在體恤夫國有典刑所以止辟代有法律原以除奸聖天子虎門示誥象魏懸書義惟使庸愚之民知法不敢恠法奸頑之類懼刑自可免刑其意深其德厚也而况為官者能不為之體恤哉或命盜傷亡當原其案之何始或淫殺謀害宜察其事之何因至於仇口相攀隱中更宜細察獄刑哀怨此際亦有微情縱或罪供果實猶必推原於再三絞斬即成宜存矜憐於一二望縲紲之疊疊澈骨酸心覩監牢之重重悲哀慘目可憐當年冒昧到此悔其何追曩昔糊塗今朝哭之奚益是望為官者存悲憫之心施慈悲於格外廣仁厚之德遺罪

犯以餘恩勿輕掉而誤人宜體恤以盡道行方便事蓄慈惠衷則不至有誤罪囚者即可以庇蔭子孫也為官者其體之

望二日酉時

馬天君降

為官勿聽書吏言文

廉明守正頌冰鑑於閭閻公斷無私歌河清於億兆為父母而不愧兩歧與歌稱循良而無阿五袴致祝斯其致治之善慈愛之恩所謂稱道弗衰者也奈何有聽書吏言者既無精鑒以為官復為偏聽而忝職以故小民受其殘酷

端由曲語而生。國法任其轉移。緣因私議而發。况彼百端
巧言。皆由受賄所致。多方審擇。已挾欺上而來。陷其術者。
必致是非倒置。中其奸者。更難曲直分明。誣良民為莠民。
煩興訟獄。陷清吏為酷吏。怨起羣黎。書吏之壞政。其弊若
此。為官之防維。能不遠乎。必精其識於未至之先。果其志
於當事之境。勿粗心惑志。當審慎於多方。勿輕信任人。宜
宵小之杜絕。念切民依。清鑒即是神鑒。獨具卓識。無私自
然遠私。由是而聽政。則明察可以除奸頑。如是而為官。則
智勇可以立民命。下食其德。上獎其賢。職此道也。世之為
官者。其法諸。

望三日丑時

桂宮袁仙降

修德培命文

粵昔管輅傳術。妙洩造化之奇。君平推星。慧通鬼神之奧。
命學傳於千古。發明化育。星象通乎百代。蹟遍寰區。然而
命宮奇美。陰陽輔之。命相鍾靈。修為培之。惟德足重。亦惟
德是權也。竊怪星學狂言妄謂。庚申洞悉庸愚無識。自輔
推算精明。祇知滿口應承。殊無益於德行。虛言粉飾。曾何
驗乎吉凶。平土運之亨通。漫云鰲頭虎榜。誇官星之顯貴。
動謂鳳閣龍墀。比比僞語欺誣。無非貪圖財利。種種浮詞。

虛詐。何嘗子評精通。況乎命理至微。聖賢不以之示教。氣數莫必。君子轉以之修身。何世人癡情命運。自誤躬修。不思彼浪蕩江湖。祇爲衣食。所以見富貴之宦族。語語尊榮。看寒賤之貧夫。言語窮困。嗟嗟若此。術數遭譴。必矣如是。雜流悔禍。晚哉。普勸塵寰多士。勵德爲先。諭爾星學同流。勸善惟急。命之蹇者。惟德其禳之。命之富者。惟德以成之。皇天無親。惟德是輔。彼妄談星學者。終虛文也。故君子以德爲務。

同時

郭仙降

地不如德文

地所以卜吉也。而吉之者陰功。地所以發籍也。而發之者陰德。然而陰功之與陰德。亦果何從事哉。曰心地培植是也。竊見奇峰秀嶺。得天地之鍾靈。平隄山邱。絕龍穴之正脈。而一則吉而禍之一。則凶而福之。此豈陰地之不足憑乎。抑亦心地之善惡別之也。如此則陰地者。心地之餘。心地者。陰地之脈。有其餘而無其脈。則餘未也。有其脈而培其餘。則脈本也。世人能明乎此。須培其心原。無務乎地脈。真龍佳穴。寸衷備之矣。亦何庸登山涉水。以踏尋哉。爾世人其以心地爲務。

午時

韓文公降

警世文

今夫天道好還。果報昭乎不爽。人心詐僞。奸慝誰有下場。欺君蠹國。未見子嗣榮昌。况必伏斧鉞。蔑倫悖親。立見禍殃。纏擾。况復啟效尤。夫不和而婦不敬。無非共作罪人。兒不友而弟不恭。要皆同爲禽獸。友誼不協。忠良純多。奸詐朋情。無事信實。立見衰亡。士林鮮德行。無怪潦倒終身。而發達無自。農圃半奸頑。是以凶歉常患。而安樂難求。奇物巧技。嘆百工之徒。壞心術而罹天殃。悖義嗜財。嗟商賈之

盡昧天良。而造禍府。淫人妻女。積莫解之深冤。皇天之振怒。何已。圖人貲財。虧後代之餘德。異日之跪賣。免乎。輕出重入。往往水火瘟疫。擾其家。謗聖毀賢。常常疾病。官非絕其命。罵風雨而踐藝字跡。終必受譴雷霆。輕老成而侮慢師尊。夫豈免乎天罰。惡婦逆公姑。安逃神誅鬼殛。貪官欺主上。罰必餓鬼畜牲。欺人終欺已。嘆愚夫枉用機關。逆理卽逆天。笑世人甘沈孽海。酒色財氣。實鴆毒。夫何偏嗜而亡其身。仁義禮智。極平安。竊願天下共登其域。戒懲之條。言之莫罄。功修之道。所貴力行。警之省之。慎勿自暴自棄也。

申時

玉天君降

書差積福文

竊聞之公門積德陰騭無窮。宰官而外。其惟書吏差役乎。蓋人有詞呈白冤。或遭無辜之陷害。控官赴案。或逢意外之拘牽。命盜殺傷。勿使威而令是非之倒置。刑囚箠杖。勿加怒而令孤苦之含冤。幸而有司仁恕。必勸勤以成其賢。倘值縣令貪偷。宜勸阻以救其失。大房辨一字之冤枉。罪或可超活。三班施半語之德。屈案因而得伸。方便陰功。何苦孤威積孽。拯援德惠。勿庸虎勢逞雄。不賣法以虐民。橫

征暴取。不瞞官而受賄。害命圖財。能如此則高車駟馬之。于東海。安在不可接其踵也。嗟嗟積德累功。莫甚官署。濟人利物。勿過公門。世之為書吏差役者。以忠厚為心。以貪殘為戒。將見子孫福澤。自不待求而自至矣。書差積福。唯是得之。

六月廿六日午時

文昌帝君降

科場選士敕令

- 一大倫無虧。德行優全者錄。
- 一淫殺不犯。言行端謹者錄。

- 一廣行陰隲諸惡悉戒者錄
- 一善教子弟昌明聖道者錄
- 一謙和忠厚仁愛公正者錄
- 一苦志勤修淑身積學者錄
- 一時行方便改過遷善者錄
- 一敬惜字紙欽重經典者錄
- 一敬刊善書流傳勸世者錄
- 一禁絕淫書不假刀筆者錄

以上敕令係吾與桂籙諸真重行酌議奏明天帝奉

旨欽此今特奉

命宣示人間布告諸士咸使知聞

選士文

士風之敗今滋甚矣予職司士籍主宰文衡拔尤選真以供朝廷之用其間甄別予奪爲汝士人計者心至深望至厚也何汝等自甘暴棄時往下流不臻上達大失予冀望之心今不忍特將選士之要從寬酌訂與汝等再三言之夫桂籍錄功首重孝弟文林注籍端取修爲察三代之功過責在城隍注一世之修爲仰以司命果其德厚才高不忝士籍予敕司文郎諸真官等桂榜錄籍早定科名或報

在場闈而魁神助筆。或救其斥落而朱衣點頭。冥冥庇蔭。至公無私。是誠選士之律令也。奈何汝等。日事詩書。行近惡路。不修尺寸之善。恒冀功名有成。夙昔矜狂。臨場祈禱。予竊笑汝等之愚。而深厭汝等之妄也。况夫功名者。上天所以勸世也。人有何等之善。必錫以何等之祿。造何等之惡。必償以何等之報。從違取舍。此其中有權衡焉。如曰真善士也。勿論積學。億富不忝掄魁之才。為吾籍所必注。即使平平文字。無甚雋奇。而德行宏深。已蒙上帝之賞。吾籍不注。其可得乎。王曾所以大魁天下也。若夫浪子狂徒。腐儒偽士。勿論學術庸劣。難以登第。縱使金篇珠句。試官亦

閱若浮詞奇卷佳文。主司偏目若泛語。况受罰猶不止此乎。李登所以削籍奪命也。由此觀之。選士之要。從可知矣。汝等能勿奮然勉皇然改。憬然悟耶。特令示諭。汝等科場所重。德行為先。修為克端。皇天自眷。彼高科巍甲。不啻反掌矣。子豈誑汝哉。

申時

桂宮金甲神降

惜字文

今夫作字傳經。洩盡乾坤之奧。明文畫卦。闡厥造化之奇。此蒼聖所以易結繩而為書契。伏羲所以演河圖而開天

道也。作字之原。其由此乎。夫隻字遺文。皆屬聖賢之名諱。殘篇斷簡。無非典籍之流傳。必也作字如對聖賢。點畫胥昭誠敬。下筆若有神鑒。句語宜戒輕浮。勿妄書窗屏半點。惜若金玉。不濫寫門壁一筆。重若珍珠。閨闈之地。勿容經史而堆藏。污穢之區。慎勿詞章之濫貼。人若遵此。科甲綿之禍患遠之。無如勸諭之言。不止千萬。奉行之事。何有分毫。庸師批字。改文。風來而吹書滿地。惜何有也。惡吏鈔呈錄案。日久而腐卷盈箱。惜安在哉。縱婦女以剪裁。責在家主。慣子弟而踐踏。罪及師親。編撰淫書。玷辱聖賢字跡。錄傳穢事。揚播他人惡行。或攜卷入廁。而觸怒鬼神。或廢字

糊窗。而任意輕賤。或包裹財物。而置於身旁。或鐫刻器皿。而擲於地下。或刺繡詩文。而供玩賞。或挑織仙佛。而作戲。頑不思半點半畫。均屬三教真跡。一書一帖。無非列聖精微。天上地下。以之感通。象數陰陽。以之闡釋。農工商賈。無字則何以營生。諸子百家。無字將何以處世。而乃輕褻疎慢。獲罪乃躬。良可悼也。須知一世奉行。天賜狀元宰相。頃刻踐褻。罰及瞽子庸夫。善惡昭然。報應不爽。與其毫不經心。而任意褻瀆。削祿因以削算。何如諸般致敬。而誠心愛惜。錫福於以錫齡。誥誨諄諄。冀爾遵守。提撕媿媿。慎其奉持。

酉時

桂宮天聰降

聽言文

甚矣聽之當謹也。昔先師語顏子曰。非禮勿聽。言仁道也。而何以及於聽哉。蓋以人之一身。五官百骸。一有受弊。則私累因之而入。而仁道於是乎不可爲。况耳之職司聽。邪正忠慝。固不能禁其不聞。而聞之又烏可以不別。倘非操之有要。持之有權。邪正忠慝。必至顛倒。始則以顛倒之故而亂聽。繼則以亂聽之故而害心。夫至心受其害。則身之爲害不可言矣。奈何世人誤其聽。妄其聽。不謹其聽。有聽

忠孝之言。而目爲常談者。有聽聖賢之言。而笑爲迂遠者。有聽仙佛之言。而謂爲虛渺者。有聽規勸之言。而反生疑忌者。有聽誠實之言。而譏其庸愚者。有聽懇切之言。而疑爲奸險者。有聽果報之言。而駭以妄誕者。於是聽邪狎之言。則生淫心。聽悖亂之言。則生逆心。聽諂諛之言。則生驕心。聽貪鄙之言。則生吝心。聽富貴之言。則生慕心。聽欺罔之言。則生信心。邪正忠慝。互相倒置。將來之爲惡罹禍。皆此誤之也。吾願世人。謹其所聽。勿誤所聽。遇善言則金石重之。肺腑銘之。遇惡言則水火視之。盜賊如之。庶不爲心害。不爲身害矣。慎哉。謹諸。非禮勿聽。

戌時

桂宮地啞降

謹言文

且夫天道不言則四時行百物生天道如是而人道可知矣然而天非終不言也春則以鳥鳴夏則以雷鳴秋則以蟲鳴冬則以風鳴天道之微且循序以發聲人而有言宜審幾以立論法古人之一默不易其言體顏子之四箴慎爾出話如是則能戒慎於未然者乃能寡尤於終身也無何侈口妄談者比比矣誦讀之子以經傳為助語之詞輕薄之流借典謨為詼諧之具笑談淫風風生四座矜言穢

事事播一鄉繪花柳之醜辭贊焉惟恐不絕摹閨閣之穢迹聞者信以為真壞人名節那顧辱及子孫摘人隱微安知仇及殺戮徒逞利口才牙毫無忌憚弄彼舌鎗唇劍且謂聰明由是習釀成風人心於以敗壞漸漬成俗世道於以變遷庸愚喜而效尤言矜雀薄佻達務於勦襲謬詔鴻詞不思陰功陰隲出口反成過愆何况妄言妄談安能逃乎夫譴嘗見生受官刑多原口孽而致死罹冥法半是訕謗使然無益於己有害於身果何為也能不懼哉吾今剴切曉諭告誡肫誠勉爾英年少進須守口之如瓶無識愚民效吉人之詞寡不輕言以取辱不亂言以招尤則禍患

遠而福祿臨。修積宏而受用廣矣。戒之戒之。勿負予訓。

廿八日辰時

桂宮轟仙降

戒殺放生文

竊以萬物化生。俱凝氤氳之氣。三才定位。廣生化育之倫。水族山禽。皆天地所愛惜。胎卵溼化。均造物之生成。何乃殘刻。貪夫食其肉。因以損其命。奸頑惡少。漁其利。遂至殺其身。殺戮慘於刑誅。彼物何罪。監牢施及禽獸。於心奚安。宰殺耕牛。不思勤勞稼穡。幽囚飛鳥。竟忘痛苦哀鳴。毒魚蝦而炙口。一味傷無數之生靈。籠鳥雀以娛心。四時絕不

盡之性命。宰鴨割雞。刀砧之慘。何極。網禽困獸。牢獄之罪。何加。縱火燒山。酷烈而棲蟄皆盡。臨淵設網。搜羅而族類皆空。豈知戴角披毛。前生原屬人命。祇緣孽深罪重。因此罰變物倫。設已想作物想。刀頭之痛苦。何傷。以我身作彼身。籠內之拘囚。何慘。須知天心惡殺。能戒殺即體天心。帝德好生。能放生即承帝德。步趨必謹。恐蟲蟻之或傷。網罟不興。令飛躍之得所。效彼采花放雀。福蔭子孫。法爾編竹渡蟻。科聯兄弟。善報昭昭。須前途之早赴。訓文朗朗。宜惕志而儆心。存仁厚於乃躬。澤及三牲六畜。施慈悲於庶物。恩遍飛潛昆蟲。無殘忍之心。戒殺自不罹殺。無刻薄之念。

放生即可延生百福。駢臻千祥。雲集皆自此中來。戒之戒之勿違。

七月朔十日巳時

土神張公降

治家有法文

木從繩則正。玉以琢而良。天下事斷無不爲而成者。家之貴於治也。其義一也。然則所以施治者。又莫貴乎有法。明倫循理其一也。長則愛幼。幼則愛長。父慈子孝。兄友弟恭。夫秉於正。婦盡其柔。伯叔子姪。以分相聯。姊妹弟兄。以禮相待。奴婢僕侍。寬以御之。閨閣內外。肅以臨之。勿食非分

之食。當念物力維艱。勿衣非禮之衣。須知驕侈非福。冠婚喪祭。恪守禮而無遺。門第宅居。安其分而弗妄。如此治家。斯爲有法。積德務本其二也。勿恃貴而凌賤。勿恃富而壓貧。勿暴殄天物。勿恣肆驕淫。勿重利謀人。勿刻薄處世。勿殺生害命。勿構訟興詞。勿輕慢宗祖。勿失禮神明。勿占人便宜。勿談人過失。勿奢華。勿吝嗇。勤耕勤讀。守乃家風。爲工爲商。保厥心術。莫貪不義之財。貪爲天怒。莫淫非已之色。淫必殺身。子孫務教正道。交遊須近賢良。荒逸是戒。保衣食之有全。而廉恥可以不墜。清白是持。惜聲名於粹美。而名節斯可弗虧。如此治家。斯爲有法。和睦嚴正其三也。

家庭所忌者猜疑也。父子夫妻兄弟叔姪一有不和必至互相疑忌。或偏聽婦言而失養。或溺情妻子而滅倫。日事參商。漸而爭鬪。非與家之兆。實敗家之尤也。是故和睦為齊家之本。信夫信夫。他若匪僻宵小。三姑六婆。隸卒娼優。巫師妖邪。亂家之媒。莫過此等。是不可不深為禁絕也。至於陰教一節。尤為正家之要。豔妝必戒。柔靜必敦。觀燈玩戲。在所必禁。生產之婦。未盈月期。勿令妄近。日月井竈。如此治家。斯為有法之三者。盛家之本。治家之原。齊家之要。體而行之。則家道昌隆。子孫發達。世代宗支。可無替矣。欲治家者。慎其以予言為式效焉。

望三日夜時

孚佑帝君降

酒色財氣歌

茫茫四海悠悠九州。幾人清閒幾人愁。清閒的漁樵農圃。志不妄求。樵子過山唱短曲。牧童吹簫跨牛溪邊老叟。坐觀泉流無慮無憂。到像世外遊。這種清福。因不望名利。關頭清閒自在。快樂悠游。莫笑他。祇有拙志。缺少深謀。他纔是有志氣。不肯吞鈎。君不見五都六市。三教九流。有些為財奔走。離鄉遠遊。衣食寬寬有。刻刻苦憂愁。吞盡天下財。枉把兒孫作馬牛。祇知道。石崇巨富。那知道。緣珠墜樓。

說甚麼高樓大廈。說甚麼玉蓋金甌。不見阿房宮。一炬化
土邱。想到此。財字一筆勾。又有等逞雄恃勢。陰險奸謀。你
看那項籍恃強橫。梟兵百萬有。運退時。何能據鴻溝。韓信
占三齊。爵顯淮陰侯。又誰知陳平設詭計。未央早斷頭。這
都是逞強使氣。概用機謀。到頭來。有幾人能長久。還有等
爭強鬪氣。狠結冤仇。無了無休。一朝大數盡。南北山上土
一邱。想到此。氣字一筆勾。又有等狂徒偽士。自命風流。效
才子佳人。跨鳳秦樓。拴不住意馬心猿。時貪着巫山楚岫。
名黜金榜。籍削玉樓。傷盡元氣。靈丹難瘳。真箇是自尋死
路。不待閻王把筆勾。君不見吳宮西子。姣美無儔。夫差惑

其志。姑蘇麋鹿遊。想到此。色字一筆勾。又有等聰明才智。
與酒爲儔。貪杯戀盞。不醉不休。妄說斗酒百篇。還效竹林
七友。沈湎濫飲。性命難留。酒病纏綿。一旦休。想到此。酒字
一筆勾。宇宙如深淵。世人似魚遊。酒色財氣。便是魚鉤。見
多少聰明伶俐。往前吞鉤。明明指點到。一箇箇擺尾搖頭。
上流不走。偏向釣灘遊。惜祇惜。一世人身。忍付東流。世人
聽吾語。急早快回頭。修善積德。定迓天庥。定迓天庥。

七月望六日卯時

地藏王菩薩降

勸孝歌

五倫結作大乾坤。一孝頻開萬化根。神聖由來供子職。人天都是報親恩。世無父母誰憐我。家有爹媽且愛孫。罔極百年心已碎。劬勞終夜舌常捫。恐兒敗德枯腸斷。望爾克家老淚吞。絕大本源稍自忝。其餘枝葉未堪論。墓臺空洒無情淚。廟貌難招不返魂。詎忍庭闈虛歲月。那堪几杖缺晨昏。掌珠如招新疵類。簷瓦遠歸舊滴痕。返哺烏猶嗟暮景。躍冰魚且媚盤飧。埋兒郭巨貧能養。刻木丁蘭歿尚存。喜見醜顏看舞綵。笑依白髮對清樽。弟兄仁讓肫誠洽。媳婦恪勤禮貌溫。何用文章惟手澤。不須鐘鼎只雞豚。承顏樂事恢先緒。繞膝家風庇後昆。四海光昌由邇室。兩間明察在家門。任他功業規模小。止此庸常世教敦。經傳焯焯千萬語。祇恭兩字道爲尊。

望七日亥時

豐都大帝降

僧道失教惡報文

粵自教闡西方。廣濟人心覺路。經傳道德。大啟悟性法門。說菩提之法慧。淨土日明。演洞元之妙音。太虛雲篆。金剛般若。盡是戒慾戒貪。玉樞報恩。無非勸忠勸孝。寶座談元。指善惡之因果。瑤臺說法。醒癡愛之愚盲。釋道流傳。由來久矣。奸僧邪道。壞何極哉。所可恨者。念誦觀音。卽謂世尊。

弟子皈依道祖。便云妙法真人。壞空門之清規。愛色愛酒。借丹家之外號。誣世誣民。豈知華嚴千卷。首重黜貪。都雷萬言。多詳務本。而乃襲釋道之名。忘釋道之實。壞釋道之教。其罪何可勝誅。其弊何所終極。如此奸徒。陽敷告盡惡。鬼嚴提城隍錄其惡籍。閻羅拷其罪魂。發解酆都。倍加慘罰。復奉佛祖道君法旨。嚴爲鞠勘。照五殿十王清供。重爲治罪。爲禽爲獸。千百劫不入人倫。變畜變牲。億萬年永無人路。陰律甚慘。冥罰至微。無可免也。世之爲僧道者。慎勿再蹈前轍。回首早登覺路。則不爲釋道之罪人者。即可爲仙佛之階梯也。凜遵勿忽。

望八日亥時

酆都殿前錄善司降

船戶店家圖財害命惡報文

嗟乎。江湖縹緲。惟羨一葉之舟。道路栖皇。誰憐三义之客。幸而舟楫有濟。獲渡岸而身全。止宿得棲。免夜行之淒楚。舟人行人。庶安所止矣。孰知船內暗伏鎗刀。窺金帛之累。累店中深藏戈戟。伺財利而搖搖。此際籲地呼天。誰駕生船以登岸。斯時投關叩扉。難尋救我之得門。觀江水之滔滔。傷慘何極。望旅店之渺渺。拯救無人。任爾傾囊苦求。彼必殺身而後已。獻裝訴免。勢更留命之不容。若輩狼意獸

心知圖財而不知惜命。梟謀蠹計。受天罰。猶必受冥刑。嗚呼。水賊行凶。安逃償報。於黑暗。店家流毒。詎免索命。於黃泉。地獄餓鬼畜生。循環償罪。油鼎刀山劍樹。毫釐不差。法語昭昭。回頭宜早。訓文朗朗。失足凜諸。

望九日亥時

豐都殿前錄惡司降

娼優流毒誤陷良女惡報文

娼優之流毒甚也。聖賢仙佛。不齒教者。詳矣。夫何足訓。然往往有誤陷良女一節。則又不得不爲之深戒焉。夫女而曰良。非失節辱身者可比。並非寡廉鮮恥者所同。乃被娼

優陷之。其謀甚慘。其計甚奸。或窺其家貧。而以重利誘其入。或因其親老。而以代養惑其心。或孤身無靠。奪其志。因以穢其身。或弱質無依。餌以財。遂至墮其術。或家欠官糧。而勸彼賣鬻。或親罹國法。而哄以贖償。甚至備價訪求。詭稱買作子媳。一朝誤中其毒。百世莫訴其冤。嘆彼清白身。軀。冤遭腥臭。嗟此貧寒幼女。誤墮孽途。逢親友而含羞。悔當年之失足。念祖宗而垂淚。哭此日之喪身。誰爲憐也。能不痛哉。嗟嗟。陷柔質於火坑。極神人之共怒。墮芳閨於冤海。罪萬劫以難償。此娼優之孽。其深若此。娼優之毒。其重如何。固人不可不知也。特諭爲良女者。矢堅貞之志。蓄耐

苦之姿。身死小而失節大。家門重而衣食輕。娼優雖毒。其如烈女何。故惜之而勸之。憫之而告之。彼良女其謹守此身焉可也。

望十日亥時

東嶽大帝降

善惡報應文

今夫禍福無門。惟人自召。善惡之報。如影隨形。天律之定。隲合陽律。陰律而不貳。夫曹之賞罰。齊冥曹人曹以無私。蓋善惡者。報應之種子。報應者。善惡之結果也。何世人昧於報應。謂報應之無憑。惑於善惡。謂善惡之無據。因昧於

報應。而善惡愈不明。惑於善惡。而報應愈不解。豈知彼蒼默爲權衡。鬼神暗爲準隲。人卽有一分之善。亦必以一分之福報應之。人卽有一分之惡。亦必以一分之禍報應之。卽至千善萬惡。無不皆然。所以積善之家。福必臨之。造惡之徒。禍必隨之。積善而未至其極。福亦未至其極。造惡而未至其盈。禍亦未至其盈。倘爲善而或墮於惡。則受禍與惡同。作惡而或歸於善。則受福與善等。是豈善惡之不明。而報應之有異乎。蓋先善後惡。上天惡其墮落。則必使惡報以警之。不然。則終禍也。前惡後善。上天喜其悔悟。則必使善報以引之。不然。安有福也。此陰陽無二理。鬼神無私

曲。即善惡報應所以無倒置也。吾掌幽冥罪籍。考核輪迴。皆按此而論善惡。定報應。無私心之徇曲。純鐵面之公明。富貴壽考子孫。惟善斯應。貧窮夭折苦惱。皆惡以因。善士臨斯降階而延致賓座。奸雄到此膝地而難免刑誅。報應如此。善惡昭然。禍福無二。此所以合天律陽律而為一例。即所以合天曹人曹而非兩途。故曰禍福無門。惟人自召。善惡之報。如影隨形。爾等眾生。其體悟之。

同時

總管東方善惡司降

穿窬賊盜失身喪節惡報文

夫人孰不愛其身。即貴乎守其節。一失其身則節敗。一喪其節則身污。如此其所以異於禽獸者幾希。奈何竟有所謂穿窬者。竟有所謂盜賊者。乃如之人。身敗而不羞。節虧而不悟。故士農工商之名皆不能居。值謂穿窬賊盜而已矣。然而彼之失身喪節者。非失於穿窬之日也。非喪於盜賊之時也。蓋壞於其先焉耳。必其人淫佚縱肆。悖亂矜誇。當時氣焰。予智自雄。亦不料後日之失身而喪節。乃未幾而家業落寞。資產罄盡。欲俯首鄉黨之前。則心有所難下。欲逞橫親朋之上。則勢有所不能。由是而後想前思。束手無策。左顧右盼。惟此一圖。有穿窬焉。有盜賊焉。心往也。意

移也。而身於是乎不能禁止矣。嗟嗟穿穴踰牆。作無賴之
事業。路劫道搶。恃惡徒之克橫。貧窮士民。因此喪財失業。
殷富巨族。多致陷命亡家。只顧苟免偷生。徒財害命。那計
刀山劍樹。碎體抽筋。陰法雖嚴。補國法之漏網。陰律有定。
本天律之難寬。穿窬賊盜。至此何逃。地獄鐵城。爾其自赴。

廿二日亥時

總管南方善惡司降

寡婦處女尼僧失節惡報文

冰霜勵志。壺範常昭。閨幃幽閑。列傳名標。出世空門。悲生
前之不德。淑身清淨。守此日之貞操。勉爾婦女尼僧。須堅

節於畢世。夫何喪心敗德。竟失節於一朝。詎知柏舟誌美。
松柏後凋。淑媛足式。貞德匪遙。塵蘊皆空。咸稱法界淨體。
痴愛屏絕。共仰蓮座清高。至白首則玉潔冰清。頌朝廷之
旌表。青年則端莊淑慎。邀里巷之歌謠。一體投誠。眾念不
雜。三朝誦佛。萬慮皆消。寡婦乎。處女乎。尼僧乎。其體至潔。
其品愈超。無何世風不古。坤道寥寥。淑德喪失。遺笑嘲。
負貞節之美名。不思正已。玷閨閣之重地。倏爾志搖。喪行
佛門。與孀婦之敗節同醜。玷身梵宇。較閨女之失節何淆。
由是臭名播於鄉里。穢聲遍於市朝。似此坤維傾頹。何顏
人世。婦行喪盡。陰律何逃。打入剜心炮烙。無邊慘苦。復罰

鐵牀銅柱。頃刻形銷。生前淫心。到此時悔爛何益。陰罰殘酷。皆此類失節而招。吾今降此法文。婦女尼僧其曉。

廿三日亥時

總管西方善惡司降

輕薄繼母惡報文

嗚呼。被蘆單衣。重大賢之孝德。臥冰求鯉。美古人之庸行。自子道衰。而後孝道慚。家庭於以起乖違。自躬行廢。而後奇行絕。宗族於以少稱許。至是而不孝繼母者。比比然矣。或微嫌而起。釁逆彼後娘。或細行而傷。夷怨彼阿母。豈知先君嗣配。分屬坤母之稱。慈妣云亡。誼同親母之德。縱繼

母而不賢。豈能稍疎子職。况天倫所能味。能無竭我孝心。必須膝下承歡。報恩情於萬一。高堂養志。盡庸德之分毫。若此則爲子可無愧矣。奈何喪薄天良。謂繼母之隔越。忝滅倫理。薄繼母而輕疎。夫安知忤逆繼母者。其罪究無容恕也。是故雷震火焚。天罰嚴於斧鉞。地獄餓鬼。陰律密於絲微。事關倫紀。無容姑寬。身陷沈淪。多由是造。世之輕薄繼母者。其速盡孝。以悔厥罪焉。

廿四日亥時

總管北方善惡司降

繼母殘苛惡報文

蓋自婦德傾頽失慈教之儀則坤道湮沒豕繼母之觀型
嫉妒爲心毫無慈愛之德鷹鷂成性致忝後繼之名家道
幸而殷富財產偏心親族倘若豪華刁惡恃勢前房子女
踐踏何異僕夫待彼心腸殘凶儼若仇敵唆乃夫而浸潤
伏無形之鎗刀譖乃父而踐殘設有名之戈戟無般苛虐
對鏡毫無傷心任意欺凌捫懷何以忍念只顧逞爾陰謀
晚年之慈妣安否那思刻彼後嗣異日之冤報何辭地下
寒心痛我兒之命薄冥中洒淚哭若輩之數窮嗟乎惡婦
狠心怎免陰曹對案後娘犬性勢必地獄耐還吾統韓善
惡遍查幽冥繼母殘苛者必使冤冤相報一一清償使彼

知陰律之難逃冥誅之爽直絕無私也特諭爲繼母者居
慈愛之忠心相聯一脈師賢淑之德範慎勿兩般則母德
可稱者卽婦道有光世之繼母其各遵之

廿五日亥時

一殿秦廣王降

不忠惡報文

今夫忠也者爲臣民之大要爲居下之本源爲交接之至
道臣子食君之祿榮君之位其受恩至大其盡忠宜篤雖
盡瘁鞠躬亦不過完臣職而已下民踐土食毛享治平之
伏食皇王之福守分急公效忠草莽分內事也若夫居下

者受其主參養之恩體恤之力雖竭力酬報無奇也至於交接一途受人附託關人得失然諾不欺終身不變要皆情義所當然此數事者皆忠所關即忠所必盡也夫何尸位興譏素餐致誚貪榮祿而玷輔弼私身家而忝股肱薄君蠹國罪莫大焉相彼小民私議國政妄談君非藐視王章且心懷逆亂行墮叛奸此法律所必誅也奴僕欺主不思扶持之恩提攜之德常懷異志蓄稔奸心而陰謀家資者此罪所難恕也交接往來皆關授受若輩陰謀詭計陽則允之陰則懷之致令附其託者難濟窘迫甚至有因此而殞厥性命者其罪尤難寬也比比負心之賊鬼神震怒

天地不容惡滿禍盈勾魂提魄本殿嚴供押照孽鏡發交各殿加刑然後罰入剛心大地獄以誅其奸心受至彌月再罰入鋸解剖舌地獄以報其言是行非之罪迨諸獄罪滿打入阿鼻獄中使其萬年千載長夜幽幽永無天日雖有他善亦不能贖即蒙慈光亦所難赦良可憫也吾統轄一殿遇此等不忠者俱如是定律如是償罪決無毫末之或爽者也今蒙上帝天恩敕闡冥報復奉關聖鈞旨顯示飛鸞特諭世之臣民與居下交接者篤忠貞之心守不二之節體真實之志則陽世積福陰府免禍矣惟盡忠者得之

尊卑亂倫惡報文

倫紀特重。古今之名義昭然。淫惡滔天。鬼神之報施不爽。縱是奴婢娼妓。且難逃乎神誅。矧其長幼尊卑。倖能免乎天罰。故或姊妹成奸。自相魚肉。伯叔私盜。忍作鴛鴦。親族長幼。因挑勾而肆淫。叔嫂翁媳。緣私狎而苟合。人倫喪盡。比禽獸猶且弗如。大義消亡。將刑罰幾無所置。是故凶惡纏身。陽法安免。刑獄俱載。冥律何逃。此類之人。大數終日。孽鏡照冤。惡鬼錄罪。押赴各殿。歷受殘酷之刑。復解阿鼻。永無超拔之路。千秋沈陷。萬劫長拘。雖罰獸變禽。輪迴亦不錄也。嗚呼。淫孽至此。無可解矣。無可解矣。

廿六日亥時

二殿楚江王降

不孝不弟惡報文

竊以孝弟爲人倫之首。綱常之原。雖百行萬善。莫不由此而造其基。蓋父母之德。同於昊天。弟兄之情。切於骨肉。古來聖賢仙佛。未有舍此而成者也。獨怪世人。昧於孝弟。甘積愆尤。違背時見於庭幃。攻伐常施於手足。富貴之家。則以口腹爲養。愛敬無存。弟兄之間。則以爭產爲先。友恭何在。若夫貧賤者流。其事父母也。非慳吝。卽棄絕。非棄絕。卽忤逆。至於處弟兄也。或偏聽妻言。而參商同胞。或隱挾微

嫌而戈矛同室。種種不孝不弟之行。固難枚舉。然卽此以定罪。彼陰律已無容赦矣。今特爲汝世人詳之。夫地獄之刑皆慘也。而慘莫慘於血湖。幽陰之罪皆苦也。而苦莫苦於無間。此二獄者。卽不孝不弟所居也。嘗見血湖浪翻。腥臭逼於遠邇。罪囚漂滿。形骸瘠若枯骸。叫聲遍黃泉。鬼聞驚膽。悲音通黑暗。聽者酸心。至若無間。長拘勝刀山之穿刺。孽風時起。倍油鼎之煎熬。長夜漫漫。何時能覩天日。刑囚纍纍。孰不畏其森嚴。不孝不弟。法重若此。實案實理。告誡無遺。爾世人其早圖之。卽改忤逆之行。庶免極慘之報。不然。二獄不能免也。

姦淫處女惡報文

萬惡淫爲首。三曹律最嚴。不淫則福積。惟淫則冤深。世人色慾薰心。受罰曷可勝紀。而於姦淫處女一節。其積孽至深。其負罪至重。故爾權衡至微。用罰尤至細。而至慘。誠足畏也。何爾等世人。不惟陰法不畏。且於聖賢仙佛。垂示戒淫諸文。一毫不知體悟。竟有巧計私姦。強行邪狎。偷香閨閣。苟效秦樓。而少艾笄女。被其染污。含羞忍辱。至醜聲外揚。往往有傷厥性命者。嗚呼。賊子狼心。必攬天神之怒。奸徒蛇志。奚免冤鬼之纏。陽世大辟。伏誅旣彰。淫孽之顯報。陰曹刑罰。苦惱復償。淫惡之冤尤。炮烙獄燒。體煉身。魂魄

銷盡鐵圍城抽筋斷骨輪迴永無不過頃刻貪迷到此慘
遭冥罰如斯惡報皆若輩自招之而自願受之也其悔哉
亦晚乎特諭

廿七日亥時

三殿宋帝王降

六淫惡報文

夫淫之爲惡大矣。淫之積孽深矣。淫之受報慘矣。淫不必
有形而始爲淫也。而無形之淫乃根芽也。淫不必顯見而
乃謂之淫也。而隱微之淫乃媒妁也。而所謂六淫者。卽此
義也。雖然。而陰律於是乎定案矣。蓋淫莫先於意淫。而心

口耳目身。其後焉者也。蓋意爲心之奴。百事未來。而此意
則反覆莫測。幾微一動。淫惡卽成。由是而心從之。眼耳口
皆從之。而身淫乃肆然無忌憚矣。淫惡至大。而其幾至微。
陰律至密。而其罰至慘。如人生犯淫惡。死押陰司。到吾殿
前。六淫之罪。一一細爲勘質。必使其諸淫等惡。皆無可逃。
然後押入各獄受罪。可見陰律無私。用罰至嚴。報施之款。
烏能爽也。其曰意淫者。先發於血湖地獄。使之時刻漂蕩。
腥血常淹。以報其意。幾亂發之罪。蓋其意至密。而其罰亦
至密也。心淫之報。發入爬心地獄。每日照心淫之數。剋取
其心。復照其心淫之時。加其重罰。以報其心志妄冀之罪。

蓋其心甚微而用刑亦甚微也。耳淫者好聽淫聲。喜聞淫事。使執刑等鬼。打入割耳地獄。耐償抵算。其數皆與所聞之淫數同。眼淫者目不正視。眼好私窺。命夜叉鬼卒。打入挖眼地獄。刀截針刺。其數俱與所視之淫數等。至於口淫者。常談閨闈。好唱淫詞。常言穢事。誑引臭行。淫書春宮。談之娓娓。淫奔醜狀。論之津津。釀淫禍者。皆由於此。此類之人。押赴拔舌地獄。敲牙割唇。循環受其苦惱。悔何及乎。若夫身淫者。壞人名節。污人宗祖。絕已禋祀。敗已陰功。發入炮烙大獄。燒膚灰骨。再拋血湖池內。食臭咽腥。終日如是。斷不稍寬。陰府慘刑。為此二獄為最。罪囚沈陷。但聞終夜

悲號。慘何極乎。是則六淫之罪。意啟之。心眼口耳助之。至身淫而成之。故身淫受一罪。諸淫因之。職是故也。吾今大開方便法門。宏闡修身覺路。明六淫之果報。諭四海之人民。誠願世人。誠心誦讀。實力宣講。使人人知所畏懼。知所奉持。風俗之幸。世道之幸也。

姦淫婦惡報文

嗟嗟。孀婦之苦也。半途折偶。傷夫婦之淒零。中歲失良。痛未亡之孤獨。縱使承嗣有人。終感傷於幼而無父。况此孤幃冷落。奚解憂於寡而無夫。松柏同心。望樹夫子之節。冰霜勵志。恩邀聖主之旌。光大門閭。表揚風化。立巾幗之模

範樹婦德之綱維關係甚大。節義可風。雖天地鬼神且為
欽憫。鄉閭戚黨亦必推尊。此豈可淫污者哉。淫污者罪通
於天也。惡淨於地也。雷霆切齒。必定霹靂粉身。神鬼誅心。
安逃陰陽償報。故夫訴於閻羅。婦婦哭於泉下。兩冤並結。
萬罰奚辭。黑繩獄痛苦哀號。報生前之巨惡。陰山後沈淪
淒楚。絕人世之輪迴。淫孽莫甚於此。條冥法斷不恕若輩。
諭爾塵寰各宜謹凜。

廿八日亥時

四殿伍宮王降

不守婦道不孝翁姑不和妯娌惡報文

嗟乎。婦道之衰也。孝德抱慚。嫉妬常聞。賢媛和順之風。今
亡矣夫。是故有壞污閭範。而德言容工。無一節可取者。有
忤逆翁姑。而愛敬和順。無一端可錄者。有性情嫉妬。而強
悍偏私。無一事不犯者。種種惡行。至聲名敗壞。而不顧公
姑憂苦。而不知骨肉傷殘。而亦不惜。嗟嗟惡婦。狼心得。勿
謂法律之不及。禍殃之不臨乎。特大限未至耳。一旦惡貫
滿盈。鬼神震怒。使其惡疾纏身。補陽律之不足。顯報警世。
明天罰之不差。後乃提入陰司。從律審決。原案治罪。巧事
豔妝者。押入鑊皮獄中。好殺物命者。罰至刀山獄內。至於
損節失身。流穢閨閣。解赴磨推碓搗。二大獄。案欸定罪。此

不守婦道之惡報也。若夫不孝翁姑者，罰於拔舌地獄，敲齒割舌，押入剜心地獄，開膛破腑，諸獄罪滿，復押赴血湖地獄，永沈獄底，浪蕩幽陰，不孝翁姑，其報有若是者。他如不和妯娌輩，詬誶時聞，傷全家之和氣，矜爭日作，致高堂之隱憂，唆分居，則手足參商，亂家庭，則乖氣凝結，此罪之所不赦也。罰以野狗地獄，嚼體碎身，以報其傷人手足之惡。合此三案，世之婦女，往往自投其苦，吾甚惡其惡之深，而又憫其刑之酷也。特爲是文，以勸世之爲婦者，須謹守婦道，孝順翁姑，和睦妯娌，陽世享福無窮，陰曹安樂有所遵而行之，受福多矣。

士人狎優惡報文

乾坤定位，夫婦之道以成。陰陽並生，男女之分以別。閨闈爲內室，婚姻本常經。此綱紀人倫之大者也。何乃身列士林，名稱儒雅，竟有感於此，而大反於常者。如狎優一事，是也。若而人者，戀狡俊之狂童，肆行漁獵，迷優人之美少，情好龍陽，陰陽顛倒，曾何顏於室人。罪惡宏深，猶痴心於賤輩，捫懷曲想，慚何如乎。推心自思，果何謂也。况復報應循環，後代之卑賤不爽，冥法有定，地獄之苦惱何逃。銅人銅柱，鐵鎖鐵枷，汝等之結局也。可不畏歟。世之狎優者，其快回頭。

廿九日亥時

五殿閻羅天子降

邪教惑世惡報文

蓋自尼山闡教。泗水傳經。三綱五常之道。朗若日星。二帝三王之傳。垂於今古。以故春秋之世。服其化者。無非純士名儒。親其範者。要皆端人君子。大哉聖人之道也。於斯而外。厥惟釋道。其道以心性為宗。其經以勸懲為務。而盡孝戒貪先之。存誠去偽先之。文雖各異。實與吾儒崇德修隱之義。同一揆也。故教雖三。其理則一。自邪教雜出。竊乎正道之似。冒乎正道之名。致壞乎正道之實。如墨子兼愛。楊

子為我滅倫壞紀。假偽亂真。與今日之白蓮聞香。天主無為等教。同為世道人心之大害。嗟嗟。正教之不行。皆邪教壞之也。可勝悼哉。獨是邪教亦甚幻矣。以吃長齋為托名之地。以念經咒為藏身之階。假借善緣為名。行其陰謀詭譎。有意籠牢愚輩。故爾言怪行僻。傳道招徒。儼然禪師說法。夜聚曉散。詭言道長煉丹。妖言惑眾。瞞驀愚人。倘婦女誤入場中。生百端之醜狀。庸頑偶陷術內。壞一世之身家。傷風敗俗。莫此為甚。欺天滅理。法所難容。惡貫滿盈。逆狀發作。遭鈇鉞之刑誅。致宗祀之殄絕。陽律如此森嚴。冥罰烏能寬恕。本殿總鞫。押赴望鄉。旋發誅心十六獄。按罪割

取復發鋸解大地獄。解其邪心。然後押入銅蛇鐵狗地獄。毒其五臟。碎其一身。諸獄備歷。押赴陰山。背後永不超生。縱是大佛慈光。亦難解釋。此等惡報。皆報其敗壞正教之罪也。皆報其蠱惑人心之罪也。皆報其擾亂世風之罪也。陰律定騫。無私若此。冥刑慘酷。無過於斯。世有邪教。急急痛悔。

示曰。吾雲南人也。錢姓。灋名。生爲御史。秉氣剛直。人已無欺。上章直言。每以國事爲己事。逝後。卽蒙上帝開恩。敕代宋龍圖閣學士。包職權衡。萬獄九幽。統攝冥府諸籍。普勸世人。須明倫紀之道。勿入邪僻之途。盡孝盡忠。希賢希聖。

方是一等人物。

士人宿娼惡報文

儒術卑污。今滋甚矣。士風偷薄。於斯最焉。旣無正大。以立身。猶復奸邪而敗德。如宿娼一事。稍重身體者。亦不屑爲。乃以日事詩書。明知道義。竟甘爲禽爲獸。忍滅天理。天倫果何心哉。真可鄙也。而汝等猶冥然不悟。且肆然弗遷。是誠地獄不陷汝等。汝等自爲地獄陷也。自爲地獄陷。怨天耶。尤人耶。嗚呼。絕子斷孫。天律已慘。刀山劍樹。冥罰奚辭。吾權司幽獄。總攝冥曹。每念世人淫孽之重。深憫世人淫罰之慘。不竟爲若輩嘆。且爲若輩憫也。爾等士子旣讀孔

孟之書。當行正大之路。媚妓流毒。害人實深。須避之如水。火畏之如虎狼。謹守儒術。維持士風。方不爲聖人之罪人。也不然。吾殿割取等心地獄。是爾等自墮也。

八月朔一日亥時

六殿卞成王降

刻薄貪財惡報文

蓋惟天生眾寶利民者。莫如金銀地產羣倫。聊生者厥惟衣食。夫財寶公器也。稱物平施而貧富乃可相濟。銀錢禍基也。損人利己。彼鬼神其何能容。嘗見婪輩貪夫。奸黨惡類。居心毫無忠厚。處世盡用機謀。謀人財產。勢迫兼以計

圖。算人身家術。窮復以利誘。詭謀深藏。陰漁利而他人不覺。殘刻內蘊。陽舍物而世誦其仁。貧民告求。惜如親割膚肉。寒友借貸。痛若剜及心肝。人談陰隲。彼則陽奉陰違。勸彼捐修。假言利微。產薄貪得無厭。括盡世財。猶是貪欲。念滔天。充滿私囊。難遂欲。豈知蘊利生孽。神鬼因而降災。多藏厚亡。禍患於以交至。或遇水火。溺焚家成荒宅。或遭官刑盜劫。室盡邱墟。殄嗣斬裔。人亡產絕。能不悲哉。然猶未足以償惡也。陽數終日。鎖提殿前。判吏算其惡行。鬼使灌以銅汁。審決一次。一次灌之。審決十次。十次灌之。罪滿之日。轉送炮烙大地獄。受其苦惱。報至此慘甚矣。嗚呼。天律

既罰於生前。冥誅復烈於死後。財爲禍基。有如是者。世人讀吾此文。猶貪乎。猶刻薄乎。諒亦知所返矣。

父母衰而薄妻子少而厚惡報文

吁嗟乎。罔極宏恩。畢生莫報。生我大德。一世難求。曰衣曰食。自襁褓育到而今。養志養身。報恩德。果能無憾。結婚而成家。我家有寄生子嗣。而續後親心稍安。孰知有妻子而父母疎。厚妻子而父母薄。夫至厚妻子而薄父母。則父母輕矣。輕父母。則以妻子爲重矣。輕者何以。父母衰邁。故也。重者何以。妻子少壯。故也。輕其所重。重其所輕。天理滅亡。人倫棄絕。禽獸之徒也。豈人也哉。豈人也哉。是故雷府

號令。憲典伏誅。天律王法。在所不免。而吾陰司之律。則又萬無可解者。熱惱獄內。萬劫不能翻身。血湖池中。千秋莫能赦宥。滅天壤理。惟此爲最。極刑慘罰。亦惟此爲最也。讀是文者。其悔也夫。

朔二日亥時

七殿泰山王降

男不和室女不敬夫惡報文

今夫夫婦之道。陰陽之道也。陰陽愆伏。則時序乖。時序乖。則萬物滯。人受陰陽之氣而生。男爲陽體。女爲陰象。陰陽配合。而夫婦之道成焉。夫之道主於正。婦之德在於順。夫

婦相得。卽陰陽之氣順也。奈何今之爲夫婦者。類皆少禮。鮮法。往往反目乖違。原其故。皆由夫婦之兩失耳。爲夫者。邪僻居身。毫無正大之氣。或入迷途而貪淫。或因偏志而絕意。爲婦者。抗傲成習。時逞刁惡之行。或恃富豪而輕夫。貧窮或逞顏色而慢夫。暗弱種種不和不敬之弊。大抵如斯也。以故男無綱紀。婦不柔順。殄祖宗之禋祀。由斯造成。啟親戚之猜嫌。緣此致釁。竟不思父母命妻大義。無容棄絕。終身靠主。婦儀首重從夫。而乃不夫其夫。不婦其婦。何能免天災之不及哉。縱爾倖逃天罰。終身無恙。豈能長生人世。不到陰曹無常奉票。鬼卒提魂。日押鋸解分身。報生平之仇恨。時仰閔。膛破腑。償陽世之欺凌。使其夫婦之罪。權衡平施。令彼善惡之條。兩無相屈。乃見典法有定。報應昭彰也。特諭爲夫婦者。調琴瑟之正音。敦和順之大道。夫睦其婦。婦敬其夫。陰府雖有刑。究不加無罪之人也。爾世人其勿違吾訓而犯吾條。

輕事鮮父寡母惡報文

嗟嗟。孝德難求。安見承顏順志。子心喪盡。純是薄德輕親。父母鮮寡。事之固難。鞠育扶持。烏可不報。何乃忤逆成性。孝順滅忘。不體鮮父寡母之志。不養鮮父寡母之身。致逆鮮父寡母之心。父而鮮。輕事而不體其鮮。母而寡。輕事而

近世區輒更筆金
不體其寡人子犯此二病。罪通於天。猶非不孝所得而論也。若而人者。天罰森嚴。必不容立於天地。陰律刻覈。勢必致永墮沈淪。輪迴陰路。往復冥中。千萬劫後。爲獸爲禽。是其大報也。觀諸此世之輕事。鯨父寡母者。醒乎否。

朔三日亥時

八殿都市王降

刀筆淫詞離書揭帖惡報文

甚矣。世風之壞也。人心之迷也。儒術之卑也。讀書士子。往往昧於聖賢之道。惑於利欲之微。壞其天性之良。肆其偷薄之習。故正道不從。歧途偏向。於是有逞刀筆者。有作淫

詞者。有寫離書造揭帖者。種種造孽。其不觸怒鬼神而遭天譴也鮮矣。蓋刀筆之害人也。蕩人財產。家庭之變。由此生。制人死生。莫解之冤。由此結。片言隻字。筆底卽是干戈。抗語稟詞。紙上俱有法律。受其害者。其含冤何可數也。作淫詞者。敗風俗。壞人心之賊也。竊見聰明秀士。穎悟才人。偶閱柳豔桃夭。便神搖於秋水。或讀天香國色。卽魂散於巫山。以致淫心蕩熾。邪欲翻波。萬惡千孽。皆緣此造。其流毒最烈。其殺人尤難。以數計也。若夫寫離書者。離間人之夫婦。斬絕人之宗支。因一時氣性狂言。彼卽從分內執筆。隨其心捏詞定案。致使人兩下分離。生則悲其承訣。死則

痛其冤誣。忍心害理。莫如是也。至於造揭帖。輩壞人之名節。破事之全成。平昔偶爾微嫌。辱罵勝於仇殺。他行或有微短。指摘加於萬千。人受其欺。已蒙其罪。果何益哉。然此數類者。鬼神在所不容。報應絕無或爽。紀算盡亡。陰曹奪命。刀筆亂俗。斷指復入誅心。淫詞殺人。砍手並及破腑。離書則鋸解分身。揭帖則抽腸割舌。諸般惡報。皆其自招。如此慘刑。犯者誰免。陰司之定。此數罪者。其刑至巧。而其意至深也。吾今降此法文。深憫世人之無知。故不惜諄諄告諭。剴切詳明。讀者其敬之。畏之。悔之。改之。

富吝貧貪不孝惡報文

嗚呼。吾思孝子。契慕久矣。我仰完人。旦暮冀之。乃思之深。而仰之切。竟難慰我深心。何厭之切。而惡之深。復爲充滿人世。貧富兩途。真令人悼嘆不置也。嘗見富家之子。以財帛爲重。慳吝爲心。豔於財。則親薄。固於富。則親輕。未盡分毫之孝。莫報萬一之恩。罪積不赦。莫此甚也。又見貧家者。流迷於財物。貪於私欲。親憂不解。謂貧將何以爲。親志莫承。謂貧實難以養。貪心洶洶。孝行渺渺。罪積不赦。亦莫此甚也。嗚呼。親之生子也。勿論貧富。而愛之則一。撫之則一。何子之於親。以富而吝。以貧而貪。竟將孝字。置於烏有。嗟。嗟。豈知三曹定案。首嚴忤逆。陽世顯報彰彰。陰司刑罰累

累。奚能逃也。况復無間汚池。歷劫苦惱之不能恕哉。噫。可
嘆也夫。可惡也夫。

朔四日亥時

九殿平等王降

殺生惡報文

惟天廣生萬物。普育羣倫。草木昆蟲。飛禽走獸。莫不貪生
而惡死焉。蓋天地一生氣。萬物一生氣。陰陽一生機。倫類
亦一生機。人受天地之中而生。不思承天地之生。竟忍逆
天地之理。是故牛羊皆生也。而人殺之。犬豕皆生也。而人
傷之。統之山禽水族。野物異類。無不肆其荼毒之殘。以致

善氣日消。惡機日熾。而仁道於以無存。嗟嗟。狩獵遍於山
林。鳥獸何罪。忍令伏乃刑誅。網毒施於淵水。鱗族何辜。竟
使殄無遺類。燒山焚嶺。絕滅蟲蟻。宰鴨割雞。共恣口腹。嗟
彼鮮血淋漓。何異罪人斬絞。骨肉粉碎。竟忘物類慘傷。宰
耕牛以肥身。寃償二世。殺義犬以滋口。報在三曹。行殺一
刀一割。罪抵變獸變禽。陽世惡盈。陰府勾抉。鬼判解吾殿
前。殺戮照律定案。逐一清算。毫末分明。抽筋刮腦。以免報
寃。搗骨灼身。以殺易殺。復押入刀山地獄。重重穿刺。時時
受刑。令彼痛苦哀求。儼若受殺之物狀。號泣哭訴。居然彼
物之情形。蓋其逞殺之心至毒。而受罪之刑亦酷矣。反覆

同還方知報應不爽。周旋曲折始悔惡孽太深。陽世殺生陰曹受苦。初非理之有二者也。世人讀吾之文當體上帝好生之心。廣仁人不忍之念。惜物惜命。修福修因。天道佑之矣。竊願廣為化導。互相勸勉。則和平康祥之世在是矣。

妯娌不和唆夫不孝不弟惡報文

嗟乎。可嘆哉。婦德沈淪。坤儀掃地。孝順翁姑。已披沙揀金之不易。和睦妯娌。又大海撈針之甚難。兄弟原自友恭。而婦有長舌。遂使二星之各面。孝弟本屬誠篤。而輕聽婦言。竟致兩下之參商。因不和遂至其夫不孝不弟而不孝不弟。實妯娌不和所釀而成者也。嗟嗟。倫常虧損。人紀滅亡。如婦之咎也可嘆哉。可惡哉。吾職司九殿察理陰陽。求選賢媛。億萬中僅有七八。嚴定極罰。婦女內幾至百千。阿鼻獄。血污池。半是此輩也。世之為妯娌者。慎勿蹈轍。從此洗心庶乎稍免焉。不然汝等自願也。

朔五日亥時

臨安府城隍

即原任土神趙公降

離鄉貿易關旅肆淫惡報文

吁嗟乎。遊子離親。別高堂之聚首。征夫前路。離故國而感懷。望雲山之黯淡。天各一方。觀車馬之徬徨。行遙百里。違父離母。憶此去飄泊無依。貿易榮生。焉敢向迷途獲罪。貨

殖公平。須懷分金之誼。魚鹽事業。好效商膠之賢。權子母之蠅頭。宜關心於二老。較錙銖於鵝眼。勿刻意於四窮。卽或暇夕。閒遊。休效龍舟之渡。縱使風流玩賞。勿作狗盜之行。貿易若此。福必臨之。天其庇矣。奈何浮蕩狂徒。時癡心於桑約。輕薄僞士。每致意於株林。貪花醉柳。猶說司馬美談。弄琴歌腔。妄想文君舊事。况乎狐媚爭妍。牀頭空而冷。愁斜眼。狠心肆毒。囊底之而漠不關心。五夜捫心。曾何顏於結髮。一朝失意。已無面於同心。毒疾腥聞。竟忘毀傷親體。橫事忽發。豈免匪類辱身。矧復神鬼朗若青天。敢謂費財免罪。惡孽滿於黑籍。那時氣短尸僵。閻羅切齒。痛心狗

奴。帶喚地獄鐵牀。銅柱狼毒。何辭受炮烙。則身肉腐爛。悔之何及。墮血湖。則咽食臭腥。哭之奚益。陰律森嚴。從今改轅易轍。迷途夢浪。急宜革面洗心。法文至理。若輩三思。明言開陳。犯者百讀。

朔六日子時

順天總城隍降

諭曰。甚哉世人之迷也。忠孝節義。畏而不前。鄙吝奸貪。趨之尤速。不思人生斯世。名教綱常。爲立身之大本。剛方正直。實砥柱之中流。人而無是。是誠偷生於宇宙間也。何足論哉。况乎人之一身。天地所生成。父母所養育。修之於家。

明道讀書為聖賢之事業。達而在上。盡忠報國。實臣道所必然。責任匪輕。其自待宜何如鄭重也。獨恨奸夫大輩。謂諛為容。殘忍為心。貪婪為志。連奸結黨。舞弄堂陛之威權。受賄枉法。敗壞朝廷之名器。國棟賢臣。必置之死地而後已。乾德君道。被陷於暗昧而難回。由是權傾朝右。妄冀世世簪纓。位極人臣。想必長長富貴。詎知竊柄求旦暮之榮。千載下臭名何洗。諂上希寵媚之旨。萬代後史筆猶污而賊臣不計及此。癡愚何極。至大惡一朝盈滿。鈇鉞何逃。陽世誅身。誅心甘遺世人戮罵。冥曹慘刑。慘罰不赦。此等奸徒。幽陰長拘。雖號泣其何益。子孫滅絕。實惡孽之使然。禍

亦烈矣。悔何及乎。故勸為人者。秉剛大之正氣。懷忠義之赤心。勿陷誣忠良。長為地獄餓鬼。勿包藏姦慝。永為名教罪人。浩氣英光。還丹心於造化。忠肝義膽。白素志於蒼天。不負天地生成。不愧父母養育。不為聖賢所棄。不使臣道廢弛。立五倫四端之大防。盡志士仁人之大節。孔曰成仁。孟曰取義。庶無愧於先聖後賢。直可告於皇天后土。都城隍楊椒山特諭。

同時

江西總城隍降

打胎溺女惡報文

竊以陰陽化矣。陽爲男而陰爲女。乾坤運物。男屬乾而女屬坤。是故人之一身。天地受之。人結此胎。父母成之。非輕易而卽爲人也。奈何竟有打胎溺女者。何狠毒之甚也。顧或有女不守貞。玷閨門之事跡。家無餘食。致弄瓦之傷。殤厭生育之煩勞。投藥破孕。惡女子之輕賤。流水溺亡。世人打胎溺女之弊。大約如此。嗟嗟。破體傷胎。嘆兒身之未備。淋盤溺水。哭女命之不辰。此卽屬在路人。能無疾首。何乃分切骨肉。有是狠心。須知血塊胞胎。皆人命之所繫。溺女微賤。豈生理之必無。鬼神攝魂奪魄。罪發血湖池中。陰司查隱查微。刑必刀山獄內。償還彼命。或罰變畜。變禽。報在

來生。豈差半絲半點。踐踏人身。實悖上天之德。殤亡已息。大傷坤道之仁。如此狠性蛇心。豈能再爲人類。奸夫惡婦。勢必永無人倫。世有打胎溺女者。急急謹遵吾文。

戊時

江蘇總城隍降

獻媚工讒。暗刀殺人。惡報文

甚矣。世風之壞也。正氣之熄也。小人行險徼倖。君子安分遭凌。宵小狐媚工讒。善良正大受屈。可勝悼哉。大抵天下之害人者。莫如讒言。而天下之亂世者。孰若獻媚。時而蛇口蜂牙。讒及善士。忽焉諛言巧語。誣彼端人。逞一時之嘴。

唇。那計傷人性命。添半語之口給。何恤破人身家。曰。渾厚
爲迂疎。言之鑿鑿。說純樸爲陰險。譖之津津。純士何辜。不
知禍從何至。良民奚罪。罔識累之何因。甚至妒忠害良。殃
及民生國計。伺隙挑釁。禍起戰鬪殺傷。彼但知細語花言。
便承意旨。安知其深仇巨禍。遺累無辜。腹中剛刀。齒上毒
藥。其殺人甚易。其貽害最深也。嗟乎。陰詐諂媚。天律烏可
遁逃。惡意奸心。冥曹奚能赦免。敲牙拔舌。諸獄之刑罰難
熬。鋸解刀刺。百般之慘苦何極。陽世毒謀殺人。陰曹刑誅
自己。循還往復。絲毫不二。孰益耶。孰損耶。

同時

安徽總城隍降

惑意風水久淹親柩惡報文

自古仁人孝親。生則養。歿則葬。蓋無所謂風水之說也。特
以塋之必堅。墓之必固。使後世子孫。知祖廬之所在。宗墓
之所居。不爲城郭。不爲溝渠。節而拜焉。時而掃焉。其意深
其禮盡。初非有惑於風水也。奈何世之人。不知葬禮之微。
僅圖陰地之吉。不知風水爲勸人之語。遂惑風水爲發籍
之梯。不亦謬乎。所可恨者。親在之年。則視親身爲可有可
無之身。曾未聞報恩萬一。子職已虧。孝心安在。其受禍猶
不知何極。而乃於盡哀守制之日。不知阡葬。反以親身爲

求富求貴之具。今日登山。明日踏穴。不知骸骨枯朽。豈能以顛馳道路者。至親歿而不安乎。噫。此人子之罪也。亦堪輿之過也。何者。堪輿妄談風水。貪剝資財。言某山有王侯地。某山有公卿穴。致愚夫聞之。遂營情於風水。妄情於安厝。由是雨零則鮮血淋漓。毫不知痛。風吹則臭氣勃拂。泚不動心。幾度春秋。卜佳城之有望。荒過日月。尋吉地之來臨。竟不思棺槨漸腐。白骨露於邱山。柩櫬久淹。青郊常爲鬼屬。此卽屬在路人。猶且傷感。况爾旣爲人子。忍令停留。迨至陰地。卜成。親身已壞。縱名山佳穴。奇地吉星。天豈能庇不孝之徒。而使獲福哉。且陰地亦甚難憑也。嘗見富貴

宦族。往往卜地求穴。以保榮華之長久。子孫之延綿。乃數傳而家業落實。後裔凋零。此豈無吉地以葬之。特無心地以培之耳。又見有貧賤之家。衣食猶且不給。而親在之日。勤勤事奉。及親歿之後。復爲誠心葬阡。乃不數世而科甲滿門。顯榮莫比。此非借陰地以發之。惟賴心地以成之耳。由此觀之。則風水不必惑。陰地不足據。而親柩豈猶可淹哉。嗟乎。劬勞深恩。未能報乎毫末。殯葬大禮。豈可任其悠游。暴露親骸。天律會罰雷劈。淹留親柩。冥法直定乃出。報應最嚴。絲毫不恕。惑風水者。其返哉。

亥時

湖南總城隍降

教訓生徒不務德行惡報文

蓋惟師道立則善人多所以補聖功王化之不足。化僻壤
陬隅於無外。卽以維風俗人心於不弊也。其所係固不重
哉。而要其所以爲教者。固不在乎詞章。不事乎技藝。並不
專乎詩文歌賦而已。有先務焉。惟務德行云爾。必先講習
五倫之道。剖晰四端之微。小學則謹其始。大學則教其成。
視聽言動。格其非禮之萌。禮樂詩書。勉以學古之則。自讀
一日則有一日之功。讀一言則獲一言之益。所謂刻責愈
嚴。學業愈進。煨煉愈密。上達愈速也。由是根抵既深。出則

無忝於國士。本原旣裕。處亦不愧爲端人。如此爲師。良足
師也。如此而教。真善教也。竊怪庸師授徒。僞士設教。博子
弟之束金。貪生徒之哺啜。改文批字。便詔不世奇才。續韻
聯詩。卽誇無敵大手。而究其教學之規爲。從未聞講及德
行二字。僅專工於筆硯。舍重圖輕。但致意於文詞。務未忘
本。所以文章無品行。則無實際經綸。學問外倫常。安望成
材子弟。此而曰師。究不知其所師者何事。此而曰教。究不
知其所教者何行也。嗚呼。聖賢之道。載之經書。師儒之職。
有關風化爲師。儒而失教。已獲罪於聖賢。白頭青巾。終窮
矮屋。生受奇窮。死陷苦惱。良可哀也。特諭世之爲師者。急

宜以教訓生徒不務德行爲戒

同時

湖北總城隍降

爲士竊名不修道德惡報文

讀聖賢書所學何事。惟志於道焉而已矣。蓋士人一身關係甚大。爲朝廷作輔弼。爲鄉黨樹規模。爲四民先率履。爲一家式觀型。事爲品誼。正大若此。彼無足輕重之名。或得或失。亦惟聽天命之自然。置之於度外而已。然而名之一途。乃國家掄才之具也。造物勸善之資也。士人修德之報也。得與不得。原有不易之遭逢。一定之氣數。安可以苟且

圖夫何不修道德者。以穿窬之爲。行盜竊之術。私心妄想。冀望靡窮。難矣哉。謬甚也。且勿論名之不可妄得。不能妄竊也。即便徼倖得之。試問鄉舉里選之條。已有之乎。家修廷獻之業。已備之乎。言念及此。愧何如也。嘗見輕薄儒士。浮僞文人。習數語之明通。便欲上治安之策。操三篇之文。藝輒想薦鄉會之場。寫淫詞於窗壁。猶云翰墨流香。作豔曲於畫屏。妄逞才子手筆。看彼作孝弟之文。不異曾子觀其持廉節之論。幾比原思孰知滿紙浮烟。何曾做得堪笑一筆俗墨。未見實行。夢寐相思。猶幻情於知州太守。私心注念。時寄意於二甲三元。詎知道德不修。已爲聖賢蠹賊。

名分苟竊。最鄙玷污儒林。似此明理。而反悖理。罪擬發變。夷民得天復。又欺天。後來永無人類。如此慘報。蓋報其土品不立。敗壞風俗。人心之罪也。爲士者其三思。

朔七日子時

山東總城隍降

謗聖毀賢妄駁正教惡報文

聖賢篤生。開萬古之教化。師儒特出。紹六經之淵源。闡百代之羣書。明倫正俗。作千秋之砥柱。振紀肅綱。此儒教之大成。所以垂生民於不朽也。自釋道闡教於東都。經典流傳於海內。梵音元音。無非戒貪教孝。佛法道法。要皆明性。

修身合三教而統觀。實歸一轍。舉三教而並論。究非兩途。何世之愚夫。每謂儒教爲難行。妄駁釋道爲外教。豈知五倫八端。皆人生所固有。綱常名教。悉聖賢之本真。極樂界中。斷無不孝之佛。蓬萊島上。誰非明倫之仙。况世道人心之不齊。非聖人何以奠定。陰陽盪摩之施運。非神化何能流行。苟不能力行身體。無怪中庸大學。皆爲具文。不知竟委窮原。以致違華道德。俱蔑其實。而且自矜聰明。惑人心而敗正教。獨誇己見。行私意以論聖賢。試爲細核其真。進探其實。則於三教至理。未能默會分毫。三教實行。何嘗知覺一二。徒逞肆口之譏彈。安知獲罪天地。妄憑如簧之辯。

論不畏負咎神明。地獄無門。緣汝等毀議所致也。鐵圍非遠。惟斯人警省其改之。不然。法律在所弗赦也。

同時

山西總城隍降

庸醫悞人堪輿輕葬惡報文

自昔歧伯傳丹。救性命於百世。楊公闡術。明地理於千秋。調藥味以回生。功高海宇。點穴脈以安死。德及骷髏。醫學精微。救莫救之性命。地道明徹。發莫發之鍾靈。此二子者。所以名貫千古也。獨怪今之習二業者。脈理未曉。自謂能醫。水法未精。動輒阡葬。無怪指下糊塗。未辨陰陽之症。盤

中強勉。難識生絕之方。以至性命喪於雜劑。鬼怒神噴。風水壞於亂談。子斷孫絕。貪蠅頭之微利。借藥殺人。且絲毫。不認其咎。假高手之虛名。因地喪德。猶茫然不知其非。竟不思良醫治疾。洞悉生人之病源。方敢用藥。善術點穴。深詳天道之子奪。決不輕行。豈若素無厭之錢財。三服卽往。陰府誇無端之諳練。一穴卽使敗家。造惡無邊。猶誇保元。壽世。招尤何極。漫說顯子榮孫。嗚呼。二罪難寬。生遭貧乏。夭折兩途。可畏。死歷五苦。三途從今。改過修身。或可將功贖罪。若復損人利己。定墮無間阿鼻。庸醫堪輿。思之思之。

戊時

河南總城隍降

窩賭剝財害人身命惡報文

夫賭之為害不可言也。入其場者靡不敗身家。害性命。而遭天譴。嘗見無業浪子。殘刻貪夫。設賭博以營生。勾挑良善。伏陷阱而漁利。流毒士民。夥無賴以同謀。猶借口於招朋聚友。誘愚民而墮局。時設心於圖利。剝財未事。則畫謀定計。結不漏之網羅。既事則暗弩伏弓。射無厭之財利。致使貧窮微賤。賣子鬻妻。時或殞厥性命。豪華富貴。傾家蕩產。因此落於下流。豈知天道好還。報應不爽。水火瘟疫。軍流大辟。即是窩賭剝財結局。害人身命下場。彼天罰陽律。

如是森嚴。豈陰法冥刑。倖能寬恕。吸人脂膏。罪發野狗分食。害人性命。押赴銅蛇吞身。刀山劍樹。報其奸心。火燄寒冰。償彼窩賭。種種刑誅。皆由局賭所致。明明慘報。爾輩急早改圖。

同時

陝西總城隍降

大秤小斗輕出重入惡報文

夫斗秤何為乎。明出入之有定。權輕重之無欺。以使不平者歸於平。不公者歸於公。此天地人心。所為合而順。行商作賈。所為均而勻也。無如人心奸巧。奸巧則大小分。而斗

秤用術。世多貪殘。貪殘則重輕別。而出入不公。是故收藏五穀。斗必大其三分。發賣百物。秤必輕其數兩。刻貧苦之窮民。暗逞手法。行奸詐於貿易。概用心機。增減精微。別乎一合一勺。稱權巧妙。行乎一兩一斤。此其圖利較甚微。而奸心則可誅。其謀財為甚輕。而惡行則不赦。心欲以此致富。况未必果富。即使果富。天豈容汝富乎。慘遭天譴。所必然也。况乎冥王注籍。斗秤之大小分明。孽鏡昭彰。出入之輕重有定。剜心烙膚。刑罰之累累何逃。碎體斷身。地獄之重重安免。陽世家敗人亡。陰府長拘不恕。斗乎秤乎。大乎小乎。輕耶重耶。出耶入耶。懊悔無及矣。

亥時

甘肅總城隍降

明瞞暗騙用巧使奸惡報文

蓋惟人為萬物之靈。居三才之位。尊莫尊於為人。貴莫貴於為人。而要其所以尊貴者。又莫如此心。蓋心可以明理。義知善惡。曉禍福。人能時時守之。聖賢此心也。仙佛此心也。神靈此心也。奈何以尊貴之物。施之明瞞。施之暗騙。施之於用巧使奸。如此則鬼蜮此心也。地獄此心也。禽獸此心也。亦何尊貴之有。雖然。特壞於明瞞暗騙。用巧使奸者。大抵瞞騙之行。起於貪利。起於逞惡。人若懷此等心。則殺

人害命之事。皆無所不爲。是好巧者鬼域也。明瞞者地獄也。暗騙者禽獸也。始而壞之。終而成之也。嗟乎。敲膚吸髓。籌算及於秋毫。陽奉陰違。機謀密於毛髮。當前則唯諾面從。肫誠不二。暗背則錙銖較盡。狡猾無端。以致陷其術者。深含不白之冤。受其害者。難言失手之事。身家零落。無不切齒而痛心。事業空亡。惟有呼天而籲地。含怨終身。哭訴閻王之殿。冤情莫白。專候鐵案之前。惡徒數滿壽終。怎免陰曹對案。到此刑定罪決。空悔陽世貪財於斯時也。猶明瞞乎。猶暗騙乎。猶使巧用奸乎。悔乎哉。此身也。陽世招愆。陰曹受罪。迷乎哉。此心也。當年機詐。此日酸寒。觀冥刑之

森嚴。實屬可畏。勉詭譎之惡類。細讀斯文。

同時

浙江總城隍降

吏役假威瞞官害民惡報文

夫法律者。朝廷所以懲奸也。自宰官之法壞。而後吏役假威。吏役假威。而後生民受苦。猛虎之苛。所由來也。碩鼠之嘆。其在是乎。訟獄頻興。差役之狐威可畏。示諭偶發。書吏之虎勢難堪。縱爾清正有司。猶牢籠於奸術。何況草茅民庶。豈脫免於苛條。執公文而網羅如奉朝廷之密旨。持官票而提究。儼顏堂陛之詔書。笞杖徒流。任銀錢而爲移轉。

盜傷劫搶。憑賄賂以爲重輕。窮民偶一控告。無厭誅求。良士或有逞詞。無端勒索。假糧票而掠取小民。利加五斗十斗。借官文而驗檢命案。例原千條萬條。田婦村民。深冤從何而白。端人善士。凌辱忍而難伸。惡吏狗肺狼心。至死難償罪案。奸書蛇行蝎志。到頭豈無迴環。害民阨官。罪擬通天之大。欺上枉法。禍實無地可容。陽世絕嗣斷裔。顯明罪惡。陰司抽腸拔舌。請看刑誅。論爾公門。其早修德。

朔八日子時

福建總城隍降

黨惡行凶欺凌鄉里惡報文

夫和睦鄉里風俗之慶也。一自不軌之流。肆行無忌。或以聚黨逞豪。因而恃惡行暴。鄰里鄉黨之間。遂受其害。此黨惡行凶。所以罪不容於誅也。由是世風下而正氣不伸。鄉里所以無善俗。梗頑多而閭鄰受苦。鄉里因之而破。好勇鬪狠。妄謂剛強不屈。行凶逞暴。猶恃勢方可加。連結書差。伏無形之弓弩。交往訟棍。恃左袒而網羅鄰里之貧窮。孤苦欺若泥塗。鄉黨之輕賤寒微。踐如草芥。肆行敲噬。因而破人身家。逞其凶頑。借此害人性命。負惡棍之夙名。侮長凌幼。逞凶徒之素號。辱善欺良。乘勢奸淫。漸而佔人妻女。凶橫嗑索。因之噬人家財。豈知惡焰彌天。鬼神早爲震

怒陽數滿日。幽冥慘受刑。拷打鐵圍。當年之豪強安在。
哀號劍樹。彼時之報應何如。鐵鎖鐵枷。報王法之漏網。斷
頭斷指。補大辟之典刑。世之黨惡行凶者。其早回頭。若仍
怙惡不悛。有悖吾文。異日孽鏡臺前。方知吾言不謬。

同時

廣東總城隍降

輕賤五穀惡報文

惟天資產萬物。貴莫貴於米糧。養育羣生。重莫重於菽粟。
五穀六麥。人賴之以養其生。雨順風調。天使之以繁其蓄。
慶豐登之盛世。當知食德報功。所有用之康年。必思珍重。

愛惜。夫何居飽煖之天。不報資生之德。竟有輕賤之。而遂
不以為意者。收存不擇潔地。任鼠雀之相傷。擄拾毫不經
心。致踐踏之無算。富貴宦家。因足食而不知愛惜。竟忘稼
穡之艱難。農圃愚昧。因豐收而任意輕拋。時或委棄於田
路。至於婦女炊爨。母狼籍於厨前。奴僕搗碓。常拋撒於臼
側。喂雞飼犬。地下之粒粒何心。畜獸養禽。籠中之顆顆何
忍。作漿而飾衣服。輕孰甚焉。遺飯而餉崇邪。惑奚若也。况
乎天命靡常。當思豐歉之莫必。而乃隨意輕棄。定見禍殃
之難逃。是故雷火震焚。皇天之顯罰不少。凶災冥獄。陰陽
之受報不差。餓死饑饉。場中孽緣。此作罰變蠻夷外域罪。

實是因。須知造化苦心。生我育我。休忘彼蒼大德。化生廣
生。勿蔑意以輕忽。宜多般而敬重。廣造福緣。永樂豐足。豈
不美哉。是爲曉諭。

戌時

廣西總城隍降

逞權恃勢。刻苦貧窮。惡報文。

蓋惟天道好還。報應昭如日月。人心空巧。善惡捷於影形。
貧富原無常局。當知轉瞬。卽非權勢。有何矜誇。試問回頭
安在。縱爾位極三公。未必常享榮爵。卽使富甲一世。豈能
久恃威權。富比石崇。難免阮家滅族。權如董卓。豈逃問罪。

殺身。嘆古今之權勢。不過半局。殘碁論人世之寒微。誰無
一朝發跡。言念及此。逞猶事乎。談至於斯。恃奚爲也。云胡
家累千金。輒欺草茅下士。權冠三族。便辱寒賤貧夫。可憐
困苦端人。冤遭殘辱。嗟彼貧寒儒士。枉受欺凌。五夜想思。
空留無端憤怨。寸衷抱恨。只落不世酸寒。然而權勢加人。
安必數之不爾。盡刻苦由汝。其如天之不容。何氣短尸僵。
平昔勢權在否。孽隨冤結。曩日逞恃悔乎。受多般之刑罪。
權勢釀成積不世之冤。尤刻苦造就。枉向黃泉痛哭。悔當
年之弄權。到此黑夜長拘。嗟嗚世之逞勢。彼時受苦。惜我
生之不修。從此悔心。須前車之當鑒。

同時

四川總城隍降

吹食鴉片烟惡報文

甚哉。人何癡迷之甚也。鴉烟之毒。厥大莫比。苟誤食之。卽能斃人之性命。豈習吹之而不壞人之身家乎。何乃浪子。奸夫。狂徒。惡類。貪食其味。謂此可以娛情。吸吹其烟。言斯且能却病。致使人皆效尤。羣焉蹈轍。而鴉烟之害。至是遍藏矣。蓋嘗論之。文人學士。誦詩讀書。明聖賢之經。樹鄉黨之望。關係甚大。責任匪輕。一自吹食鴉烟。則士品以敗。士行日偷。儒林下流。學校敗類。卽是儻矣。如此則爲士者可

吹烟乎。若夫農家者流。時有事於田疇。業惟本乎耕稼。衣食用度。非辛苦無以遂其生。一自吹食鴉烟。則失其時。廢其事。上負官糧。下貽家累。如此則爲農者可吹烟乎。至於爲工作商。各有執業。工則借技以謀生。商則行貨以求利。惟勤惟儉。養爾身家。一自吹食鴉烟。則藝不精者。必朝夕之不給。業不專者。必財利之多虧。爲乞丐。爲盜賊。又其慘者也。如此則爲工商者可吹烟乎。嗟嗟。鴉烟何裨於人。實鳩殺於人也。鳩殺於人。而人偏嗜之好之。吹食之。是真受其鳩殺而不知其鳩殺者也。以故父母含怨。妻子受貧。手足參商。親朋賤惡。骨肉瘠瘦。奚啻餓鬼。慘容身似。觸體儼

然乞夫形狀。而且中年夭殂。短命鬼牛。是汝曹絕後斬支。乏嗣人多是爾等。報至如此。亦云慘矣。而豈知猶有甚焉者。冥法俱載。陰律昭然。剜心灼膚。報以棄失親身。劍樹鐵牀。誅其忤逆不孝。慘哉慘哉。吾甚嘆吹食鴉烟者。負罪若此之大也。因爲剴切示諭。確實指陳。爾輩須急急破迷障。出迷津。掃烟魔。絕烟路。改過遷善。身體力行。勿因烟孽。而爲苦海中人物。以積不世慘。

亥時

貴州總城隍降

豔妝惡報文

今夫世風無升降。而亂世風者敗焉。人心本善良。而惑人心者壞焉。夫敗世風而惑人心者。莫豔妝若也。蓋世風貴於正。豔妝則以邪而亂正。人心莫不良。豔妝則以淫而蔽良。龍圍鳳帕。觸眼無非淫風。玉環金釵。渾身毫無正意。堆錦繡而豔色。裙帶飄香。架珊瑚而繡花。衣襟煥彩。綾羅翠袖。美色直如宮妝。錦緞青衫。珍紋何異香襖。只知逞色弄嬌。極妍盡態。庸計狂童浪子。意馬心猿。道左身經。淫詞因之而起。路傍目注。醜態由此而生。壞俗因而傷風。謠傳濮上。敗常復以滅紀。約效桑間。流弊非輕。談之深爲痛恨。殺人不淺。厥罪烏可倖逃。是以此等惡婦。若斯醜行。生遭不

美之名。死受無窮之苦。嚴提罪魂。押至炮烙大獄。重勘惡孽。報以野狗慘刑。罰淫蕩之罪愆。血污池。漂流不赦。誅暴殄之惡孽。叫喚獄痛苦莫逃。豔妝受報。其慘若此。世之婦女。速改之。

同時

雲南總城隍降

陰法無私文

今夫笞杖徒流。陽法所以止辟。幽都鬼國。冥王所以誅奸。地獄餓鬼畜生。三途之報何慘。陰府阿鼻無間。五行之屬。莫加看刀山之慘刑。銀光射目。觀劍樹之極苦。鋒豔寒心。

油鼎浪翻。熬透罪人之骨。火山焰起。焦爛惡犯之身。血污池中。淹流逆子。忤媳鐵圍城內。拷打婪輩奸雄。孟婆亭之迷湯。昧惡類之本性。孽鏡臺之實錄。現陽世之罪條。刻薄貪財。難免銅汁灌口。奸詐盜偽。罰以鐵鉞。心妖僧不守清規。永沈無間。偽士不敦倫紀。長墮幽泉。婦女奸讓。副心兼以拔舌。兄弟爭鬪。則足復使割肩。望鄉臺之孤魂。半是貪花浪子。枉死城之罪犯。無非斲命輕生。罪罰熟惱。師事妖邪之徒。刑擬寒冰。習行嗑騙之侶。惡籍儘多。言之莫盡。總之難免冥誅。善報無私。畧舉其端。以彰慶賞。有自孝順。父母。免十殿之鞫供。而超昇極樂。忠愛君主。消六道之輪。

轉而上列仙班廣積陰功安居西方駐節敦行友敬餞送
福地超生補經所之孤燈祇照誠心懺禮轉輪殿之寶蓋
專迎正直修行榮祿福壽報三世之因緣智慧文章賞一
生之端正陰法無私原無或貳冥律有定人世圖之

朔九日子時

威雄土主感應大黑天神降

冥法先施忤逆姦淫文

地獄幽陰誠可畏也冥司刑罰慘何極乎鬼犯哀鳴嗟夜
臺之悲苦孤魂骸骸嘆陰路之悽惶億萬劫沉淪永墜無
非負罪招愆千百種刑罰難逃首嚴奸淫不孝此其罪鐵

案注之陰律定之而實則斯人自招之是故陰罰固無可
原而至於二罪則不赦諸罪固不容緩而定其二罪則尤
先墮阿鼻苦無間又其後者也失人身罰禽獸皆其所取
焉吾竊嘆生人罪籍莫此二條為甚陰司用刑亦莫此二
條為先也特勸世人與其犯此二罪而為冥遭所不容何
如悔此二罪而為陰罰所不及孰甘孰苦孰是孰非世人
自謀可也

朔九日亥時

十殿轉輪王降

奸淫尼僧惡報文

逆境處之最難。而婦女處逆境尤難。然婦女處逆境固難。而獨至爲尼僧則更難。髻齡出家。既離父而別母。中年削髮。尤寂寞而淒零。誦經禮佛。惟守寂寂之禪林。出世清修。僅伴落落之山月。苦矣憫哉。奈何奸徒不軌。賊子逆天。或挑勾以動其心。或引逗以私其色。玷穢佛門。早激鬼神之震怒。腥污禪院。不顧雷霆之殛誅。色膽迷天。淫孽置之罔覺。姦心洶湧。惡報竟若靡聞。豈知陰陽注定。毫釐分明。生前慘遭天罰。死後歷受刑誅。城隍嚴鞫。各殿加刑。罪惡滿押。赴轉輪照供錄。精爲措置。禽獸不能也。螻蟻蜉蝣。磨滅生氣。難爲人形矣。轉輪殿實案諭。

諭曰。蓋自兩儀分形。三才定位。陰陽動靜之理。人類生死之原。無非此一氣之所往復。轉輪者。陰陽之氣。卽生死之氣也。是故剝而復。復而剝。動而靜。靜而動。或生或死。或顯或晦。天道也。而轉輪因之矣。然則所謂轉輪者。輪迴陰陽之生死。注定人物之位置。凡一切富貴貧窮。胎卵溼化。俱皆聽其裁成。決無有絲毫之舛錯。幽冥至此。所謂善惡歸根。陰陽大限也。是故有爲善爲惡。而不事轉輪者。有爲善爲惡。而轉輪有同而異者。有爲善爲惡。而轉輪有異而同者。何謂爲善爲惡。而不事轉輪者。彼夫陽世德大之人。壽數告終。貞元翕聚。上界擢受天仙。本殿親身餞送。夫何待

轉輪孽大之人。片善不修。無惡不作。獄底永墮。沈淪陰山。常為魔厲。夫何能轉輪。大善大惡之不專。轉輪者若此。何謂為善為惡。而轉輪有同而異者。因其人之為善為惡。而較其或少或多。彼為善而僅爭一簣者。則報以顯榮。冀其造於全美。為善而僅有數事者。使其有生富厚。令彼易於行修。至於作惡較多。罰入殘疾。倘或肆惡如常。則身後永無人類。作惡較少者。轉生貧賤。果其行修足取。則再世自享安康。善與善異。惡與惡殊。其轉輪又如此。何謂為善為惡。而轉輪有異而同者。如人所行所為。或善或惡。經各殿之抵算。實兩平之過功。即發輪迴。轉生人世。求名者老於

微名。求利者終無大利。子孫壽考。亦僅平平。受用雖有不。同。遭際原無二理。此中人之轉輪。復如此。嗚呼。紅塵落落。明斯理之甚少。青天湛湛。報世人之極公。轉輪雖設於吾。實設於人也。實設於人之心也。人欲知轉輪之為轉輪。能。明一心之為轉輪。則轉輪可不必轉輪。即轉輪亦必無難。受之轉輪也。人其善為自謀。

八月朔十日寅時

釋迦佛祖降

開闢即有因果文

粵自混沌初開。陰陽並位。萬物於以生焉。清濁分布。氣化

醇育。天地於以明焉。然後星辰昭示其文。山川鍾育其秀。五穀百物。供世人以養生。布帛泉刀。需天下之急務。虞夏治而制作統之。文武出而制度備之。光天化日。人民得安矣。雖然。曾亦思何因而得此。豈當此而竟如此乎。鴻濛未判。已早而爲之因矣。匪特是也。桀紂周幽。秦漢攻伐。亦豈當時而始作乎。抑亦早有所因矣。嗚呼。世人盲甚哉。何不知因果也。夫天地一因果也。古今一因果也。盛衰一因果也。漸而近之。生死因果也。天壽因果也。榮枯得失因果也。人不明因果之大者。故卽其小者亦昧之。不明因果之小者。遂並其大者而忽之也。况乎因果非晦澁也。幾代治則

幾代亂。數世安則數世危。靜驗其原。何莫非因而果。果而因也。生死天壽榮枯得失。循環微密。了無雜亂。要皆因其所因果其所果。以使無絲毫之外錯。悉絲毫之脗合。此因果之大者。卽因果之至微者也。其他顯者。如今日有因而明日得果。今年有因而明年有果。祖父有因而子孫始果。又皆無所錯亂。隱有定騭。人豈弗明哉。其微也。其顯也。善惡之爲因而禍福之爲果也。此其幾至密而其著甚明。人若知因果之原。會循環之理。參陰陽之道。別善惡之微。而後知上下古今。非上下古今之自爲上下古今。亦上下古今之自爲上下古今也。故曰。天地一因果也。古今一因果

也。盛衰一因果也。至理之言各宜服思。

午時

九天衛房聖母降

因善惡定子孫文

今夫世人之求子孫也。亦求其承嗣焉耳。夫安知承嗣之理哉。必其祖厚德深仁。澤及子孫。自瓜瓞可詠也。螽斯可歌也。麟趾可卜也。噫。斯亦何待求嗣。而嗣斷無不至矣。夫嗣者德之餘也。人未有無德而能有嗣者。即未有積德而猶無嗣者。善惡衡之也。功過判之也。鬼神鑒之也。嗚呼。人豈可妄求嗣乎哉。吾爲世人解曰。爾欲求嗣。善以培之。爾

之絕嗣。惡所戕也。世人醒乎哉。何妄想也。嘗見世之愚夫。或子孫難繼。或後嗣難留。萬一發心。不曰掛幡。即曰敬對。不曰許愿。即曰供齋。偷常陰騭。概行不顧。噫。此求嗣也乎哉。抑褻瀆吾甚也。夫吾奉上帝之命。簡校人間善惡。廣錫人間子孫。如曰此大德人也。即使命數無嗣。吾必錫以智慧嬰兒。使之光其祖德。大其家聲。能如是。則不必求嗣。而嗣自永矣。所可恨者。奸夫惡婦。敗壞祖宗之德。猶冀子孫之保。豈知子孫者。非子孫也。我之餘德也。我而無德。是斬子孫也。而猶曰求乎哉。且無論求之不得也。即使求之而得。而或生產以喪其身。或痧痘以斃其命。求乎哉。奚益也。

即不然。或肆行不類。必傾蕩其產而後亡。至中年無嗣而
即死。求乎哉。愈慘也。蓋至是而嗣絕矣。嗟夫。人何惑之甚
哉。僅知子孫之當求。而不知善之當積。惡之當改。無怪終
日求嗣。終是絕嗣。此之咎也。嗚呼。求嗣之法。不必求神。當
求諸己。絕嗣之報。非神能絕。實人自絕。何也。善惡分途。吾
亦禮之於二者而已矣。欲求嗣者。曷返諸

申時

文昌帝君降

欲貴子須積德文

竊以桂院名標。祖宗之德澤先富。杏林香暖。陰隲之行修

必深。淵源繼美。科甲延綿。此積德之驗也。獨怪世人不知
本原。徒徇末務。有子而罔識栽培。任其折敗。居身則肆行
奸慝。猶冀後昌。豈知佑啟無片善之流。籍由何發。詒謀無
寸功之積。貴自何來。所以陰行有虧。三榜之顯榮已黜。功
德未至。二甲之待詔無從。至若五桂聯芳。祇緣陰功浩大。
一子鼎甲。實因救急慈仁。往事俱載。善惡昭然。欲貴子者。
當知所從事矣。夫何愚昧者流。不於德行必之。而乃於僥
倖求之。不於性分培之。而乃於虛妄竊之。愚何如也。謬孰
甚焉。須知以吾德而求子貴。皇天決不負有德之人。況古
人之獲報可證。吾無德而望子貴。桂質豈能產薄穢之地。

使梗頑萌微倖之心。是故桂錄嗣籍。錄有德之純士。丹書天榜。書長厚之仁人。所謂皇天無親。惟親有德。此誠理之不易。勢所必然也。欲遺子者。其深思之。

亥時

王天君降

殺子莫如溺愛毒文

孔子曰。愛之能勿勞乎。此何說乎。大抵愛者。父母之情所鍾。亦父母之誤所始。何也。愛必勞。而愛乃真愛。愛而不勞。是偏也。是溺也。是毒也。豈得謂之愛乎。蓋天下愛子之法。莫如以孝弟忠信。時為講習。驕奢淫佚。時為禁止。復使之

明大學之經。知小學之要。詳因果報應之說。堅身體力行之心。無放縱無稍寬。如此之愛。愛也斯真矣。竊怪愚夫愚婦。常存愛子之心。不明愛子之道。隨其所欲。廢其所學。護其所短。誇其所長。錦繡膏粱。飾其身。以悅其口。聲色狗馬。隨所欲。以任所為。而彼且曰。此吾之愛子也。旁觀者亦曰。此某人之愛子也。而不知其子之迷途。即自此入。其子之性情。遂自此乖。世道間。端人正士。自此曰疎。鄉黨中。惡類匪徒。自此曰暱。就如斯肆行無忌。不殺其子不已也。噫。嗜愛子。固若是之愛哉。若是之愛。是直以砒霜而醫子疾。以鴆酒而令子飲也。悲夫。悲夫。迨至習慣既深。趨走愈下。勢必

悖逆行凶。干犯朝廷。憲典上則殄宗滅祀。下則喪身敗家。此時而始惺然悟。翻然悔。所謂日已西下。猶望朝曦。真萬萬不可得之事也。哀哉。吾故曰。殺子莫如溺愛毒。

望一日卯時

雷府辛天君降

養女不教貽後悔文

且夫教子之法。宣示以義方。而教女之模。貴束其德性。闡門重地。較明窗淨几。而尤嚴。內則箴規。比讀書行文。而更切。况賦性柔愚。難明善惡之理。而關繫重大。宜示教誨之良。四德三從。勉以坤維之大。烈女賢婦。使效貞德之風。

家修身。自他年坤儀足式。平居務德。小異日婦道有光。如此施教。賢媛必矣。若斯勵德。良婦非乎。夫何愚夫溺愛。謂女教之無庸。視婦德為細事。豈知慣習成性。何望後日之改圖。驕養成風。奚免失教之譏議。玷閨闈而流穢辱。及宗親。播惡跡以腥聞。臭遺父族。甚至出醜露乖。污染親戚。行凶肆逆。罪連家門。陰質無良。徒痛心於五夜。惡婦不德。空扼腕以千聲。悔何及矣。罪豈免哉。教誠箴銘。各宜謹凜。

巳時

月老仙翁降

婚姻文

蓋自陰陽生而男女定。乾坤泰而夫婦成。婚姻者所以配陰陽之位。體乾坤之道者也。未有婚姻而或忽焉者。卽未有婚姻而非因緣者。其所素定也。夫婚姻有夙世之善因。有現世之善因。有夙世之惡因。有現世之惡因。有餘而現世報之。有夙世之善因不足。亦現世報之者。如賢夫婦之同偕百年。受子孫之榮。享安樂之福。此乃其夙世之善因。而現世受福也。此婚姻之義也。又如夫婦和諧。琴瑟比美。克成家業。無墜箕裘。此乃其現世之善因。而現世受福也。此婚姻之義也。若夫夫婦反目。時形交謫。至終無所解者。此乃其夙世之惡因所積。而現世受報也。此婚姻之義也。至於失凰悲鳳。

彼此分離。或賢夫而早夭。或良婦而中殂。此乃其夙世之善因不足。而現世失意也。此婚姻之義也。然此皆陰陽定理。循環一轍。決無有一絲之或忽者。何也。姻者因也。因善惡而爲之緣也。緣者原也。原善惡爲之因也。人欲知婚姻之緣。必先明善惡之緣。然後知天壽禍福之緣。能如此。則婚姻循環之妙。自不言而喻矣。

申時

桂宮楊仙降

新婚明心志文

嘗謂心不明則昏。志不明則暗。昏與暗。爲心志之所必除。

卽爲終身之所宜戒。然則除與戒亦除於何時乎。亦戒於何事乎。曰是在新婚。蓋婚者。生人之當理也。而新婚者。又欲念所由生也。理稍不敵乎欲。欲卽足以勝理。當此之時。是誠理欲之戰場。人生之變機。心志之魔厲。倘一縱馳。是誠可危也。故曰貴明心志。然心志之明。則又有不易焉者。夫人當精力方盛之年。正欲情初動之會。卽邪念易纏之時。雖素行持重者。猶難必此境之操持。若夫庸愚則更可慮也。何也。新婚時之教誡。爲師父所恒忽。家庭所難言。其不爲物欲所蔽也難矣。孔子曰。少之時。血氣未定。戒之在色。人能卽此而三思。以己身爲重。以情欲爲輕。以防閑爲

望三日辰時

雷府辛天君降

逆子忤媳快回頭文

吁嗟乎。天恩如此其厚也。天罰如此其嚴也。概往古而來。今善惡有定。嘆逆子與忤媳。悔悟其知。孽海茫茫。悟從前之失足。惡籍累累。須自此而回頭。幸微倖之餘生。苟延人世。趁歲月之不逝。痛改無遲。篤孝心於高堂。報罔極之大

德盡婦道於膝下。奉翁姑以無違。樂樂融融。序天倫之樂事。肫肫切切。自彼岸之可登。回頭矣。快乎哉。百福駢臻。千祥雲集。善報可食也。世之爲逆子。忤媳者。其快回頭哉。幸莫之大也。

同時

桂宮呂大仙降

治家戒奢華文

今夫治家之道。惟貴守先。而齊家之方。端在務本。自夫人昧於整率。而後家規敗。務於奢華。而後家政衰。驕侈矜誇。窮奢極欲。以祖宗之基業。爲靡費之貲財。忘創造之艱難。

肆驕淫之氣習。家庭日事宰割。戕物實所以戕身。衣服矜尙綾羅。耗財卽所以耗德。高歌宴飲。流蕩成風。壞紀瀆倫。衰亡立見。以故奢而佚。佚而淫。華而乖。乖而敗。不數年間。當日之所謂千倉萬箱者。至此則杼柚其空矣。曩昔之所云。供旨食甘者。於時則酒漿告匱矣。富家子弟。轉瞬不異乞人。朱門兒郎。過眼卽爲狗盜。旁觀見之。嗟嘆。路人聞之。感傷。嗚呼。奢華之禍。如是慘烈。至敗家而猶不止。豈不悲哉。故勸世人。家而富貴。須節用之維均。家僅小康。宜勤儉之是務。本忠厚以作良田。耕之不盡。崇樸實以爲事業。用之靡窮。如此。則家政克修。子孫式效。門庭亦常享康吉矣。

治家者其法諸

未時

九天司命竈君降

敬竈文

夫竈為斯人之生氣。為一家之生原。敬之則吉。褻之則凶。其理真誠無貳。其驗絲毫不爽。權衡紀錄。至月晦彙奏。通明善惡昭彰。值歲終降於人世。暗室私語。吾聞若雷。隱密否臧。無條不奏。竈之所權。其嚴若此。竈之宜敬。人其知乎。何乃愚夫愚婦。不明敬竈之理。常為褻竈之行。朝夕咒咀。輒怨恨於厨前。晦臘殺生。時宰割於竈側。喂雞飼犬。狼籍

米糧。敲金刮鍋。無端褻瀆。逆父母而慢翁姑。時激予怒。煮牛犬而烹鯁鱔。令我心惶。少婦行月。妄自輕身。竈前惡婦。欺天時為咒盟。厨下種種弊端。難以備數。重重罪籍。實屬可噴。吾今顯化飛鸞。普諭大眾。其各敬以持躬。無使司命奏惡。善以行已。自然止達通明。家庭和順。福祿駢臻。惡曜遠離。吉祥擁護。惟敬竈者得之也。爾世以其無背我九天司命之言。

同時

趙將軍降

修齋須修德文

齊之爲言齊也。齊其所不齊。而致其齊也。蓋人心不無所偏。惟齊則正之。行事不無或過。惟齊則裁之。如此之齋。齋心也。齋身也。齋善也。齋之義最微密。敬以臨之。齋之道最精深。誠以格之。此而曰齋。不愧齋也。自世人不明修齋之理。致昧修齋之原。原何居。德是也。德無所虧。即齋無所虧。齋無所虧。即修無所虧。修無所虧。則無地非齋。亦無時非齋也。奈何愚夫性偏。徒竊齋口之名。不務齋心之實。設醮登壇。妄說呈疏。天闕赦孤。批牒詭言超度。幽冥三日五日。供醮無非虛文。龍華松華設場。要皆故事。明明善惡統宗。置之度外。往往虛靡假局。奉之若神。嗚呼。德敗當躬。雖親

炙神靈其何益。德虧寤寐。即日聚仙佛亦何因。須知改過省愆。自然神天眷佑。去惡從善。定爾福祿駢臻。德之至也。齋何庸乎。世之徒事修齋者。其轉而修德焉。則幸甚。

酉時

關將軍降

戒婦女入寺燒香文

竊以閨門爲風俗所關。婦女以貞潔爲貴。稍有疵瑕。其玷於閨壺也不少。孟子曰。男女不親授受。明有別也。夫以授受之間。猶不可苟。是入寺燒香。則斷非所宜也。明矣。何乃婦道傾頽。竟聞齋供寶刹。坤德污壞。故爲禮拜名山。三五

成羣携兒引女。鮮衣飾服。粉面豔妝。跪拜暇則嬉戲笑談。妄評孰賢孰醜。齋食餘則羣言紛語。時議某是某非。甚而男女混雜。僧俗聚語。小則惹外人之議論。大則成邪狎之厲階。其弊又有不可明言。不可勝道者。世之婦女。何執迷之甚也。須知翁姑即是活佛。堂上勝朝乎西天。貞節自然神欽。爾室可達乎南海。若徒癡心寺院。迷意燒香。且以為求男女得福。壽保平安。是誠在此。吾不知祈何福。適自招其禍也。普勸善良婦女。賢淑女流。與其入寺燒香。而敗節虧名。招褻瀆之禍。失婦女之儀。何如在家。而孝順翁姑。尊敬丈夫。和睦妯娌。愛惜身名。克全婦道。則神必佑之。福必

臨之。求子得子。求壽得壽。應之如響也。倘婦女偏執不悟。而為父為夫為子者。須嚴為禁之。切為止之。善為勸之。自然閨門可正。風俗可端。婦道可全也。不然罪連汝等。

同時

王將軍降

宣講救劫文

夫宣講何為乎正人心也。挽末俗也。弭災害也。然末俗之挽。末俗不能自為挽。必待人心挽之。災害之弭。災害不能自為弭。必待人心弭之。故人心一正。而末俗遷而災害化。要皆宣講之功。所為立其基而收其效也。吾嘗見澆漓之

區。罹難之地。風俗披靡。災難迭興。無識愚頑。每以諷經爲
消災之計。以供醮爲避難之謀。究之百端祈禳。絲毫不驗。
一旦有正士端人者。出察其人心。驗其天道。至是而宣講
興矣。宣講興而人心知悔。咸知善之可爲。惡之當去。則未
俗於以格。劫難於以清。而世道康平矣。嗚呼。抑何功之速
而德之溥哉。大抵宣講者。救人心之藥石也。所言皆孝弟
之道。所講皆善惡之銘。所法皆正大之條。所戒皆奸邪之
事。知者奉而持之。則可以爲哲。爲賢。爲愚者。遵而行之。則可
以修善。修福。其功大。其效速。其德廣。正爲此也。故勸世人
遵重宣講。扶行教化。將見遇難成祥。慶昇平之春色。逢以

化吉。樂盛世之淳熙。豈不懿哉。遵之重之。

望四日巳時

漢趙將軍降

年老宜養德文

人之一身。渺若浮雲。孩提百歲。朝露夕曛。所貴立德。乃足
超羣。詞理徑直。聊示訓文。蓋天下三不朽。惟德爲量。人能
以修之者。立之。則身亦與之不朽矣。然立德固自修始。而
要自養終。是不可不保之於老年也。大抵人至於老之時。
精力則值衰弱。性情復短乎勇往。苟養之功未裕。卽德之
量難充。如此無論素之有慙於德者。宜養。卽素之無歉於

德者亦宜養也。養德不基重哉。養在保身。則酒色宜戒。養在保心。則貪嗔宜除。養在性情。慎無以躁急而傷血氣。養在飲食。必須以淡泊而法古人。至於言語事爲。動靜起居。尤爲老年之所宜斟酌也。養德如是。則必造於仁者之域。不待養生而松柏自如也。不必求壽而遐齡自裕也。皓首丈夫。矍鑠偉人。允推是儔矣。人其善養哉。

亥時

面然鬼王降

檢惡永墮鐵圍城文

陰罰累累。地獄重重。嘆鬼犯之哀號。叫聲地府。嗟孤魂之

飄蕩。哭震幽都。鬼判書而惡司錄。注畢世之愆尤。五殿鞫而十王誅。受無限之凄楚。如此慘刑。端緣作惡而致。若斯罪案。皆由積孽而招。然而猶未足以償檢惡者也。有償惡之地焉。鐵圍城是也。夫鐵圍至苦也。其罪至慘也。入其中者。則又有入而無出也。周圍則萬里千旬。悲無邊而無岸。循環則冤獄血海。痛難受而難熬。佛法慈光。莫蔭其間。鬼犯罰禽變獸。不在此中輪迴。若此地者。又陰曹之一死路也。嗟嗟。造惡孽而不悛。沈淪永墮。受刑誅而莫免。痛苦何追。古來賊黨奸雄。於今猶在世之逆子忤媳。至此難逃。鐵圍城之慘。人皆畏之。而竊怪人偏墮之也。吾今喚醒大眾。

指破機關。爾世人急急覺悟。皇皇懺悔。不可趨於惡路。陷於深淵。若有視爲陳文。而復蹈惡孽者。是鐵圍不爲爾圍。而爾自爲鐵圍圍也。鐵圍鐵圍。人其急悔。

望五日戌時

關聖帝君降

諭曰。吾自庚子。雲遊天下。顯化飛鸞。馳驅風塵者。十餘載矣。而求一扶道之人。卒難一遇。今於此堂。得諸子以扶吾道。頗不枉吾數載飛鸞之苦心。故返性圖一書。吾同二帝所奏上帝。於元旦垂降。今於中秋告竣。雖天緣人事之感。召亦諸子之心。所圓而滙者也。不然。遙遙四海。斯人擾擾。

矣。而何以返性圖書。獨賜於諸子哉。且不特此。古來善書流傳。何止億萬。而能有聯絡有次第。有門面。有生死。有輪迴。有結收者。究莫如返性圖一書。今諸子得之。諸子之功也。吾得諸子。吾心慰矣。吾道行矣。教化可興矣。天心可復矣。未劫可挽矣。以是論之。皆諸子之功也。跼立賜酒。諸子幹此功。可跼飲矣。

返性圖輯要寶錄坤冊終

返性圖輯要寶錄坤冊

三

浦城吳贊銜

番禺羅登銜

南海吳悟銜

新會譚壽康同校刊

順德譚曦光

南海馮明銜

丹陽周翼銜

廣州城內西湖街酌雅齋承刊

